



ԳԵՎՈՐԳ ՍՏԵՓԱՆՅԱՆ

ԴԻՏԱՐԿՈՒՄՆԵՐ ԳՈՐԻՍԻ ՄԵԼԻՔՈՒԹՅԱՆ ՀԻՄՆԱԴՐՄԱՆ ԵՎ ԱՌԱՋԻՆ ՄԵԼԻՔԻ՝ ՄԵԾ ՄԵԼԻՔ- ՕՉԱՆԻ ՈՒ ՆՐԱ ՈՐԴՈՒ՝ ԲԱՂԻ ՎԻՄԱԳՐԱԿԱՆ ԱՐՁԱՆԱԳՐՈՒԹՅՈՒՆՆԵՐԻ ՇՈՒՐՁ*

Հայերեն վիմագիր արձանագրություններն իրենց ծանրակշիռ տեղն ունեն Գորիսի պատմությունն ավանդող սկզբնաղբյուրների շարքում: Վիմագիր արձանագրությունները հատկապես գնահատելի են Գորիսի մելիքության հիմնադիր Մելիք Օհանյան-Հուսեփյանների տոհմի տարբեր սերունդների կյանքի տարեգրությունը վերականգնելու տեսանկյունից¹:

Մյուսյաց աշխարհի Հաբանդ գավառի հնավանդ ու հարուստ կենսագրություն ունեցող բնակավայրերից է Չագեձորի (Չագաձոր)² կամ Վարարակնի լեռնահովտի բարձրադիր գոգա-

* Հոդվածը ներկայացվել է 23.11.2019 թ., գրախոսվել՝ 15.12.2019 թ., տպագրության ընդունվել՝ 20.12.2019 թ.:

¹ Մեջբերված վիմագիր արձանագրությունների բնագրերում վերականգնումները կատարել ենք պայմանական հետևյալ նշաններով.

... Կետերով նշված են եղծված կամ ջարդված գրերը՝ անկախ քանակից:

/ Գծով նշված են տողերի սահմանները:

□ Փակագծով նշված են եղծված կամ ջարդված տառերի վերականգնումները:

┌ Փակագծով նշված են փորագրողի բաց թողած, «պատիվ» նշանով կամ առանց դրա հապավված տառերի կամ տառակապակցությունների վերականգնումները:

² Մյուսյաց տան XIII դ. պատմիչ Ստեփանոս Օրբելյանը «Պատմություն Տանն Միսական» աշխատության մեջ նշում է, որ Միսակի տոհմից սերված Չագ նահապետը Վարարակն գետակի հովիտը «...կոչէ յիւր անուն գձորն Չագեձոր...» (Ստեփաննոսի Միսնեաց եպիսկոպոսի պատմություն Տանն Միսական, ի լոյս ընծայեաց Մկրտիչ Էմին, Մոսկվա, 1861 (այսուհետ՝ Ստեփաննոս Օրբելյան, էջ 7): Հատկանշական է, որ XIX դարասկզբի ֆրանսիացի հայագետ Ժան Անտուան Սեն-Մարտենը «Պատմական և աշխարհագրական հիշատակությունները Հայաստանի մասին» (հ. II) աշխատության մեջ, որը հիմնականում վերաբերում է Ստեփաննոս Օրբելյանի «Պատմություն Տանն Միսական» երկի քննությանը, Հաբանդ գավառում նույնպես հիշատակում է Չագ (Dsak) անվամբ ձորը (տե՛ս Mémoires historique et géographiques sur l'Arménie, J. A. Saint-Martin, t. II, Paris, 1819, p. 129): Նշենք, որ Մյունիքում գյուղերի զգալի մասը տեղափոխված է ձորերում, և

վորության վրա, Վարարակն գետակի վերին հոսանք՝ Քրմագետ կամ Վերիշեն¹ վտակի ձախափնյա կանաչապատ ձորամիջում և բլրալանջին ընկած Հին Գորիս (տեղացիների կողմից անվանված Յերի Շեն, Վերին Շեն)² գյուղը՝ հնահիմք Գորայք-Գորէս-Գորիս-Կյորես-ը³: Գորայք-Գորիս գյուղի տարեգրությունը անխզելիորեն կապված է Սյունյաց պատմության հետ և կազմում է նրա մի մասը: Սկզբնաղբյուրները փաստում են, որ, ասպատակությունների ու անօրեն տիրապետողների հալածանքների պայմաններում, Գորայք-Գորիսը հնարավորինս կարողացել է պահպանել իր գոյությունը և շարունակել ծավալել ազգային մշակութային կերտ գործունեություն՝ ի հնուց անտի հանդիսանալով Հաբանդ գավառի քաղաքակրթության բնօրրաններից:

Գորայք-Գորիսը միշտ չի մնացել շեն ու բարգավաճ, այլ, ինչպես Հայաստանի բազմաթիվ բնակավայրեր, պարբերա-բարենթարկվել է ասպատակությունների՝ ավերվել ու կո-դոպտվել է: Գյուղը դեռ շունչ էր քաշել իրար հաջորդող նվա-ճողների (արաբներ, թուրք-սելջուկներ, մոնղոլ-թաթարներ, Լանկ-Թամուր, սրանց հետքերով՝ կարակոյունլու և աղկոյուն-

նրանց անուններն էլ սկսում կամ վերջանում են «ձոր»-ով, օրինակ՝ Կոռնիձոր, Հալիձոր, Այգեձոր, Առաջաձոր, Ձորաշեն և շատ ուրիշ շենաձորեր ու ձորաշեներ:

¹ Քրմագետ կամ Վերիշեն վտակը Վարարակնի ձախ օժանդակն է: Սկիզբ է առնում Աղոթաքարի լեռնանցքի Քոռ աղբյուրից և Վերիշեն գյուղի մոտ միախառնվում մայր գետին: Երկարությունը 5 կմ է (տե՛ս Հայաստանի Հանրապետության ֆիզիկաաշխարհագրական օբյեկտների համառոտ տեղեկատու-բառարան, Երևան, 2007, էջ 135): Վարարակն գետակի մյուս օժանդակը Մեծշեն վտակն է: Սկիզբ է առնում Մեծ Իշխանասար լեռան հարավային լանջերից և Ակներ գյուղից արևմուտք միախառնվում մայր գետին: Երկարությունը՝ 11 կմ (տե՛ս նույն տեղում, էջ 84):

² Չպետք է շփոթել Ստեփաննոս Օրբելյանի՝ Աղահեջք գավառում հիշատակված «Վերին շեն» բնակավայրի հետ (**Ստեփաննոս Օրբելյան**, էջ 375):

³ Գորայք-Գորիս տեղանվան լեզվաբանական-ստուգաբանական քննությունը տե՛ս **Հասարթյան Մ.**, «Ձորաշեն-Գորու», Հայաստանի ազգային արխիվ (այսուհետ՝ ՀԱԱ), ֆ. 1109, ց. 1, գ. 46, թ. 2; **Մարգարյան Ալ.**, Գորիսի բարբառը, Երևան, 1975, տե՛ս նաև **Խույկի՝** Մի քանի տեղանունների ծագման մասին, ՊԲՀ, Երևան, 1988, № 4, էջ 123-124; **Քումուկց Մ.**, «Գորիս» տեղանվան ստուգաբանություն: Գիտական հոդվածների ժողովածու (Նվիրվում է Հրաչյա Աճառյանի ծննդյան 140-ամյակին), Երևան, 2016, էջ 378-396:

լու թուրքմեն քոչվոր ցեղեր) ավերիչ արշավանքներից, հարստահարումներից, երբ ենթարկվում է Արևելյան Այսրկովկասի հարավային (Երասխի (Արաքս), Կուրի միջին ու ստորին հոսանքները)՝ Մուղանի դաշտավայրերում անասնապահությանը զբաղվող թուրքմենական թերեքեմե (տարբ. թարաքա-մա)¹ կոչվող ռազմատենչ վաչկատուն ցեղախմբերի ասպատակությանը: Թերեքեմեների առաջնորդ ուն Մահմադ (տարբ. Նեհիլ-Մուհամմեդ)² խան Ղաջարը, որը «...շատ երկրներ էր ավերել»³, այք ունենալով Արարատյան բարեբեր դաշտավայրի հարստությունների վրա, բավական մեծ բանակի զլուխ անցած՝ 1749 թ. օգոստոսի սկզբներին⁴ Մուղանի դաշտից արշավում է Երևանի վրա⁵: Իր չարագործություններով ու դաժանություններով հայտնի Մահմադ խանը ասպատակության է ենթարկում նաև ճանապարհին ընկած շեն ու ծաղկուն հայաբնակ բնակավայրերը, այդ թվում՝ Գորիս-Կյորեւ գյուղը: Մահմադ խանի արյունարբու գորքերը գազանային չարությամբ թալանում և ավերում են գյուղը. բնակչության մեծ մասը անլուր չարանքներով սպանվում, գերեվարվում կամ դառնում է բնավեր:

¹ Թերեքեմե «թուրքմեն» բառի արաբերեն հոգնակի ձևն է: Թուրքալեզու թուրքմենական ցեղախմբերը պատկանում էին դվրաշ ցեղին (տե՛ս **Петрушевский И.**, Очерки по истории феодальных отношений в Азербайджане и Армении в XVI – начале XIX вв., Ленинград, 1949, с. 91-92).

² Տե՛ս Թուրքական աղբյուրները Հայաստանի, հայերի և Անդրկովկասի մյուս ժողովուրդների մասին, հ. Ա: Կազմեց՝ **Ա. Մաֆրասյան**, Երևան, 1961, էջ 202-203:

³ **Մելիքսեթ-Քեչ Լ.**, Վրաց աղբյուրները Հայաստանի և հայերի մասին, հ. Գ. (ԺԸ-ԺԹ դդ), Երևան, 1955, էջ 172:

⁴ Տե՛ս *Армяно-русские отношения в втором тридцатилетии XVIII века. Сборник документов*, т. III, отв. ред. **В. Восканян**, Ереван, 1978, док. 174, с. 241.

⁵ Տե՛ս *Հայոց պատմություն*, հ. III, Նոր ժամանակաշրջան (XVII դարի երկրորդ կես-1918 թ.): Գիրք առաջին (XVII դարի երկրորդ կես-XIX դարի վերջ), Երևան, 2010, էջ 88:



Հին Գորիս-Վերին Շեն գյուղի Չոր թաղամասը

Հաբանդ-Չագեձոր գավառի հինավուրց գյուղերից մեկին հերթական անգամ բաժին ընկած այդ դառն ճակատագիրն աղետաբեր եղավ նրա համար: Անպաշտպան ժողովուրդն այս արհավիրքի դեմ պայքարելու ոչ մի միջոց չունեւր. անկարող էր հակահարված տալ թշնամու գերակշիռ բանակին: Այս աղետից հետո երբեմնի բազմամարդ¹ ու նշանավոր գյուղը տնական ժամանակով կորցրեց իր վաղեմի փայլը և վերածվեց ավերակ գյուղատեղիի: Այդ են փաստում

¹ Հավաստի աղբյուրները փաստում են, որ XVIII դարի երկրորդ քառորդի վերջերին գյուղն ունեցել է 700 տուն (տե՛ս **Հայկունի [Շրիշե ավ. քին. Գեղամյանց]**, Ուղեգնացական ակնարկներ (II), «Մեղու Հայաստանի», Թիֆլիզ, 1886, օգոստոսի 10, № 45, տե՛ս նաև **Արզամ, Շուշուց Տաթև** (ճանապարհորդական նկատողություններ), «Նոր-Դար», Թիֆլիս, 1888, մարտի 11, № 35): Ընդամենը՝ եթե յուրաքանչյուր տուն միջին հաշվով 5-6 շունչ հաշվվի, ստացվում է, որ գյուղն ունեցել է ավելի քան 3500-4200 բնակիչ: Նկատենք, որ հետագոտվող ժամանակահատվածում նահապետական հայկական գյուղերում, իբրև ընտանիքի ձև, գոյություն է ունեցել մեծ ընտանիքը կամ գերդաստանը: Այդ դեպքում յուրաքանչյուր տուն հաշվվում է ոչ պակաս, քան 10 անդամից բաղկացած: 1885 թ. ամռանը Գորիս գյուղում ուսումնասիրություններ կատարած ժամանակի հայտնի տնտեսագետ Սմբատ Բահաթրյանի տվյալներով՝ գյուղում կային 10 հոգուց բաղկացած ընտանիքներ (տե՛ս **Բահաթրեան Ս.**, Մի հայեացք այժմեան Չանգիագոր գաւառի գիւղացւոց տնտեսական դրութեան վերայ, «Նոր-Դար», Թիֆլիս, 1885, օգոստոսի 22, № 140):

ինչպես ձեռագիր մատյանների, այնպես էլ վիմագիր արձանագրությունների՝ գյուղի մասին լրությունն ու անորոշությունը: Մեծ դժվարությամբ խուսափելով գյուղ ներխուժած ասպատակիչների բարբարոսություններից և հետապնդումներից՝ կոտորածից և գերեվարությունից փրկված գյուղացիները ստիպված թողնում են իրենց պապենական բնօրրանը և ցրվում զանազան կողմեր, ապաստան փնտրում լեռնային անառիկ բնակավայրերում, ծվարում անմատչելի լեռնածերպերում և այլուր: Ֆիզիկական բնաջնջումից փրկվելու համար գյուղացիների մի մասն ապաստանում է Հաբանդ գավառի ամենահին բնակատեղիներից մեկում՝ Շորին ձորից հարավ՝ Ծակեր անունով հայտնի անդնդախոր ձորում (այդպես է կոչվել իր մեծ թվով բնական և արհեստական քարայրների շնորհիվ)՝ պատմական Աղոջրիկ¹ լքյալ բնակավայրում, որի միջով հնուց անտի հոսել է Վարարակն գետակի վտակ Շոր ջուրը: Հիրավի, դժվարամատչելի, կիրճերով ու խոր ձորակներով մեկուսացած այդ արծվաբույնն իր բնաշխարհագրական առանձնահատկություններով, բարձր ժայռերի մեջ և ձորալանջերին փորված անառիկ ու անմատույց բազմաթիվ մեծ ու փոքր այրերով հարմարավետ մի ապաստարան էր թշնամիների՝ դեռևս չդադարող ասպատակություններից պաշտպանվելու համար: Տոհմիկ Գորիս-Կյորեսից, Տեր-Մինասյան գերդաստանից սերող, Հին Գորիս (Վերին Շեն) գյուղի ծխական քահանա Հակոբ Տեր-Մինասյանն իր տոհմի մասին 1919 թ. հունվարին հեղինակած «Հիշատակարան»-ում², որում պատկերված

¹ Ա. Ղարագոյանի դիտարկման համաձայն՝ Ծակերի ձորը Ստեփաննոս Օրբելյանի հարկացուցակում (հին ցուցակ) հիշատակված «...Աղոջրիկ գյուղն է, որն իր անունը կարող էր ստանալ Շոր ջուր վտակը կազմող սելտերյան աղբյուրներից...» (**Ղարագոյան Ա.**, Ձագաձորի տեղադրությունը, ԼՀԳ, Երևան, 1985, № 11, էջ 60): Ս. Հախվերդյանը ձորափի աջափնյա տափարակում ընկած ներկայիս *Լղջիազի* տեղանունը համադրում է Աղոջրիկ անվան հետ և իրավամբ գտնում, որ «...այդ հողատարածքը պատկանել է Աղոջրիկ գյուղին» (**Հախվերդյան Ս.**, Գորիսի ամփոփ պատմություն, Երևան, 2005, էջ 31):

² Հակոբ քին. Տեր-Մինասյանի ձեռագիրն առաջին անգամ «Հիշատակարան» խորագրով որոշ կրճատումներով հրատարակել է արձակագիր Մերո Խանգադյանը: Ձեռագիրը գրողին էր հանձնել Հակոբ քին. Տեր-Մինասյանի Փառանձեմ դստեր որդին՝ պրոֆ. Վազգեն Գրիգորի Հայրապետյանը (տե՛ս **Խանգադյան Ա.**, Տեր-Հակովբ

իրադարձությունները մեզ տանում են գյուղի պատմության խորքերը, «Ծագումն հորն իմոյ Մինաս քահանայի» ենթագլխում գրում է. «Իմ հայրը՝ Մինաս քահանան բուն Գորիս գիղացի է եղել, Մինասանց տոհմից: ...Մեր մեծ պապը եղել է Մինասանց Թունին¹ ... Դոքայ հին Գորիսից տաճիկների և պարսիկների ասպատակությունների ժամանակները ապաստանած են եղել **Գորիս գիղից բարձր ծորակում, որտեղին ծակերի ծոր են ասում, նայնպէս և շորջրի ծոր են ասում** (ընդգծումը մերն է՝ *Գ. Մ.*), այդտեղ մեր պապ Թունին մեռնում է, գերեզմանը յայտնի չէ...»²: Ողբերգական դիպվածից փրկված և գաղթի ուղին բռնած Գորիս-Կյոբեսի տարաբախտ բնակիչների մի մասը, հարկադրաբար հեռանալով հայրենի եզերքից, հանգրվան է գտնում նաև Արցախում, իսկ առևտրական դասը՝ ընդհուպ նաև Ռուսաստանում, Վրաստանում և Պարսկաստանում³:

Աղետաբեր այդ դեպքերի պատկերը լիակատար և բազմակողմանի ներկայացնելու համար ստորև վկայաբերենք աղբյուրների հաղորդած վավերական վկայությունները: Այս առումով, պատմական հենք պարունակող ավանդազրույցներից և ձեռագիր մատույններից բացի, աշխարհագրական-տեղագրական ու պատմաագագրական նյութի կարևորությամբ աղբյուրագիտական սկզբնաղբյուրի դեր են ծառայում նաև ճանապարհորդ-տեղագիր հեղինակների հաղորդած տեղեկությունները: Հատկանշական է այն իրողությունը, որ այդ ճանապարհորդական նոթերի շնորհիվ նաև գիտական աշխարհը ճանաչեց Գորայք-Գորիսի անցյալի պատմության որոշ դրվագներ:

Տեր-Մինասյան Գորիսեցու «Հիշատակարանը», ԲՀԱ, Երևան, 1989, № 2, էջ 125-136): Ձեռագիրը ներկայումս պահվում է Հայաստանի ազգային արխիվում, Ս. Խանզադյանի անվանական ֆոնդում (Ֆ. 798, ց. 1, գ. 1220, թ. 1-172):

¹ Մյունիքի և Արցախի ժողովրդաբաբառային խոսվածքին բնորոշ առանձնահատկությամբ Հարություն անձնանունը կրճատվում և արտասանվում է նաև Արութին, Արթին, Արութ, Հարութ, Արթո, Թյունի, Աթուն ձևերով (տե՛ս **Աճառյան Հ.**, Հայոց անձնանունների բառարան, հ. Գ, Երևան, 1946, էջ 519-520):

² ՀԱԱ, ֆ. 798, ց. 1, գ. 1220, թ. 136-ի շրջերես:

³ Տե՛ս **Արզամ.** Շուշուց Տաթև (ճանապարհորդական նկատողություններ), «Նոր-Դար», Թիֆլիս, 1888, մարտի 11, № 35:

Քննվող հարցի լուսաբանման համար առանձնահատուկ են 1887 թ. ամռանը¹ Չանգեզուրի գավառում ճանապարհորդած «Արգամ»² ստորագրությամբ հանդես եկած հեղինակի՝ «Նոր-Դար»-ի 1888 թ. մարտի 11-ի համարում հրատարակած «Շուշուց Տաթև (ճանապարհորդական նկատողություններ)» ուղեգրական նոթերը, որոնցում Գորիսի հնաբնակներից գրառած տեղեկություններից հնարավոր է դառնում պարզել վերոնշյալ իրադարձություններին վերաբերող որոշ մանրամասնություններ: Սկզբնաղբյուրային ու վավերական կարևոր արժեք պարունակող այս նոթերը ցարդ անծանոթ են եղել գիտական շրջանակներին, ուստի ստորև մեջբերում ենք ամբողջությամբ: Ըստ իր ձեռքի տակ եղած աղբյուրների՝ Արգամը գրում է. «Կորիսը իր համանուն գետով բաժանվում է երկու մասի. հիւսիս-արևելեան կողմը մի ահագին ժայռից կպած է Կորիս գիւղը, իսկ նրա հանդէպ մի երկայն տափարակում–քաղաքը...: ...Հին Կորիսը գտնվում էր այստեղից (գավառակենտրոն Գորիսից - Գ. Մ.) 2 վերստ հեռու դէպի արևելք՝ (հարկավ, տպագրական սխալ է, պետք է լինի հյուսիս - Գ. Մ.) 700 տուն բնակիչներով, սակայն տեղն ամուր չլինելով, պարսից արշաւանքների ժամանակները ցիր և ցան են եղել և, ինչպէս ասում են, բնակիչների մի մասը գաղթել է Ռուսիա, մինը Վրաստան և միւսը կուլ է գնացել նոյն իսկ Պարսկաստանի մէջ... մնացել են միայն 18 տուն հայեր: Օհան անունով մի հայ կամենալով այս մնացեալն էլ իրեն բաժին անել և ազատել մի կերպ հրոսակների ասպատակութիւնից՝ առնում է սրանց և բերում այն ահագին և անմատչելի ժայռի տակ, որտեղ այժմ Կորիս գիւղն է: Օհանը կարգվում է գիւղի իշխան և պետ, և համարվում այժմեան Մելիք-Հիւսէինեանների նախապապը: Գիւղը ընդլայնելով հետզհետէ շատանում են բնակիչները և դառնում են Մելիք-Օհանի հպատակ: Օհանի ժառանգներից այժմ Կորիսում գտնվում է մեծ Մա-

¹ Տե՛ս նույն տեղում:

² Հեղինակի ինքնությունը պարզել չհաջողվեց: Սակայն նրա՝ «Նոր-Դար»-ին հղած մեկ այլ թղթակցությունից հայտնի է դառնում, որ եղել է շուշեցի (տե՛ս **Արգամ**, Շուշի, «Նոր-Դար», Թիֆլիս, 1890, ապրիլի 6, № 38):

նուչար-բէկ Մելիք-Հիւսէինեանցը – մի պատկառելի և ազդեցիկ անձնատրութիւն և Կօրիսի առաջին տուն»¹:

Այժմ տեսնենք, թե մեզ հուզող դէպքն ինչպէս է նկարագրում գիտական ազգագրության երախտաշատ և նշանավոր ներկայացուցիչ Երվանդ Լալայանը, ով ազգագրական-բանահյուսական նյութեր հավաքելու նպատակով 1897 թ.² ամռանը ճանապարհորդել է Զանգեզուրի գավառում: Գիտնականը Զանգեզուրի հովտում գիտնական-հետազոտողի բարեխղճությամբ հավաքած ազգագրական նյութերի՝ գրառում-պատումների հիման վրա «Զանգեզուր» ուսումնասիրության մեջ՝ «Մելիք Հիւսէինեաններ» վերտառությամբ ենթագլխում, վկայաբերում է Նոր Գորիսի հիմնադիր Մեծ Մելիք-Օհանի տոհմի շատավիղներից Մելիք-Հարությունի որդու՝ Մանուչար բէկ Մելիք-Հուսէինյանի՝ իր տոհմի մասին հաղորդած տեղեկությունները, որոնք ստուգապատում սկզբնաղբյուր են Գորիսի պատմության ուսումնասիրության համար և փոքր-ինչ այլ իրերի ընթացքով հավաստում ու էապես լրացնում և ամբողջացնում են Արգամի ուղեգրական նոթերի բովանդակած տեղեկությունների ճշմարտացիությունը: Ինչպէս վկայում է Ե. Լալայանը, «Այս տոհմից այժմ կենդանի է Մանուչար բէկը, վերջին Մելիք Յարութիւնի որդին, ամենից սիրւած ու յարգւած անձ-

¹ **Արգամ**, Շուշուց Տաթև (ճանապարհորդական նկատողութիւններ), «Նոր-Ռար», Թիֆլիս, 1888, մարտի 11, № 35:

² Ե. Լալայանը Զանգեզուրի գավառում ճանապարհորդել է նախապես պատրաստված գիտական ծրագրով: Ձեռնարկելով որևէ շրջանի ուսումնասիրությունը՝ նա օգտագործում էր մատենագիրների և այլ հեղինակների անտիպ կամ տպագրված հատուկենտ տեղեկություններն ու հավաքած նյութերը հարստացնելով իր աղբյուրագիտական հենքը: «Զանգեզուր» հատորի հրատարակությունը պատրաստելուց առաջ՝ «Ազգագրական հանդէս»-ի 1897 թ. Բ գրքի «Այլ եւ այլք» բաժնում նա ընթերցողներին հայտնել էր. «Արդէն ձեռնարկուած է նիւթեր հաւաքելու Լոռու (Տաշիր) և Զանգեզուրի գաւառների մասին, ուստի խնդրում ենք, որ նիւթեր ունեցողները ուղարկեն մեզ իրենցն էլ, մերինների հետ միացնելու: Պարզ է, որ իւրաքանչիւր նիւթ կը տպագրուի հաւաքողի ստորագրութեամբ» («Ազգագրական հանդէս», Թիֆլիս, 1897, գիրք Բ, էջ 381): Ի դէպ՝ նշենք, որ Ե. Լալայանը Զանգեզուրի գավառում շրջագայել է նաև 1903 թ. ամռանը՝ Կովկասյան հնագիտական ընկերության անդամ եղած ժամանակ (տե՛ս Հնագիտական ընկերութեան նիստը, «Մշակ», Թիֆլիս, 1903, յունիսի 3, № 117):

նաւորութիւն, որ սիրով պատմեց ինձ իւր տոհմի պատմութիւնը և ցոյց տուեց մելիքներից մնացած գրութիւնները»¹:

Ե. Լալայանը, հենվելով Մանուշար բէկ Մելիք-Հուսէինյանի իրապատման և նրա տրամադրած արժանահավատ վավերագրերի վրա, դրանք լրացնելով հինավուրց Քարահունջ գյուղի Տէր Հովսէփի քահանայի վավերականություն ունեցող տեղեկություններով ու տարեց մարդկանց սերնդեսերունդ պատմվող ավանդազրույցներով², փաստագրում է, որ «Մելիք-Հիւսէինեանների տոհմը յառաջացել է հին գորիսեցի խոջա Լազարի³ որդի Լալայից, որի աւագ եղբայր Պարոնից սերել են այժմեան Պարոնեանները⁴, իսկ կրտսեր եղբայր Աւագից՝ Աւագեանները: ...Կարճ միջոցից յետոյ թարաքեամայ թափառականները յարձակուում են Հին Գորիսի վրայ, բնակիչներին կոտորում, թալանում և ցրում»⁵: Թերեքեմէ հրոսակների վայրագությունների հետևանքով կոտորածի զոհ է դառնում նաև գյուղի մեծատուն տոհմից սերող խոջա Լազարի (Դազար) թոռը, Լալայի որդի՝ Բաղրը, որի երկու զավակները՝ Օհանն (Յոհան)⁶ ու Ամիրը, մագապուրծ հաստատվում են Արցախի

¹ Լալայեան Ե., Ձանգեգուր: Նիւթեր պապգայ ուսումնասիրութեան համար, «Ազգագրական հանդէս», Թիֆլիս, 1898, գիրք Դ, № 2, էջ 8:

² Տե՛ս նույն տեղում:

³ Վիմագրական տեղեկությունները փաստում են, որ Մելիք-Հուսէինյան տոհմի նախահայրն էր Մկրտիչը: Նրա որդին՝ խոջա Լազարը (Դազար), մահացել է 1688 թ.: Գերեզմանը գտնվում է պատմական Գորայք-Գորիսում, ներկայիս Վերիշեն գյուղի հին գերեզմանատանը: Տապանաքարին արձանագրված է. «ԱՅՍ Է ՀԱՆԳԻՍՍ ՄԿՐՏՅԻ ՈՐԿԻ ՂԱԶԱՐԻ» ԹՎ. ՌՃԼԸ (1688) (Բարսայան Ա., Այր Մեծ իշխան Մելիք Օհանը Գորիսի մելիքության հիմնադիր, «Բան ու Գործ», Գորիս, 2012, հունվարի 27, № 1-2): Լազարի որդին էր Լալան, որը մահացել է 1713 թ. և թաղվել Վերիշեն գյուղի Ս. Հռիփսիմէ եկեղեցու բակում: Տապանաքարին արձանագրված է. «ԱՅՍ Է ՀԱՆԳԻՍՍ ԼԱԼՈՒՆ ԹՎ. ՌՃԿԲ» (1713) (նույն տեղում):

⁴ Պարոնյան նշանավոր գերդաստանի շառավիղները մեծ դերակատարություն են ունեցել Գորիսի հասարակական-քաղաքական և կրթամշակութային կյանքում: Տոհմի շառավիղները հասարակությանը շատ արժանավոր զավակներ են տվել պետական պաշտոնյա, գեղանկարիչ, բժիշկ, առևտրական և այլն:

⁵ Լալայեան Ե., Ձանգեգուր, էջ 8:

⁶ Նկատենք, որ Հովհաննէս անձնանվան գրության նկատմամբ հայ մատենագիտության մեջ դարերի ընթացքում մշակվել է այդ անձնանվան տարբեր գրության ինչ-որ ավանդույթ: Գրության բազմազանության օրինակներից են՝ «Յոհանէս, Յով-

Մելիք-Շահնագար Բ-ի (իշխել է 1748-1792 թթ.) տիրությունը գտնվող Չանսխի գյուղում¹: Օհանը, որը եղել է քաջակորով անձնավորություն և դեռևս պատանի հասակում ռազմունակությամբ աչքի էր ընկել Դավիթ-բեկի գլխավորած Սյունյաց ազատամարտի ժամանակ², շատ չանցած այստեղ ևս հայտնի է դառում իր քաջագործություններով և ամուսնանում է «...շօշեցի³ մի մեծատան աղջկա հետ»⁴:

Որոշ ժամանակ անց, երբ դադարում են վաչկատուն ցեղախմբերի հարձակումները, երբեմնի շեն ու ծաղկուն Գորայք-Գորիս գյուղը վերականգնելու նպատակով արհավիրքից փրկված և անառիկ վայրերում ապաստանած անտերունչ փոքրաթիվ գյուղացիները դիմում են Օհանին, որ «...գայ իրենց

հանե, Յովհան, Յոհան, Յոնան, Յովան, Էզան, Եկան, Օհան» և այլն (տե՛ս **Աճառյան Հ.**, Հայոց անձնանունների բառարան, հ. Գ, էջ 537-538):

¹ Տե՛ս **Լալայեան Ե.**, Չանգեզուր, էջ 8:

² 1841 թ. ամռանը վիճագրական նյութեր հավաքելու նպատակով Գորիս գյուղ այցելած Սանահինի վանքի վանահայր երախտաշատ Սարգիս վրդ. Ջալալյանցն իր «Ճանապարհորդություն ի Մեծն Հայաստան» ճամփորդական-տեղագրական մեծարժեք աշխատության «Գորիս» վերտառությամբ ենթագլխում ուշագրավ տեղեկություն է հայտնում (ամենայն հավանականությամբ բանավոր գրույցներով ավանդված) գորիսեցի «անպարտելի այրն Յոհան»-ի մասին, որը «...միացեալ ընդ Դաւիթ իշխանի արար գրաջութինն բազումն» (**Ջալալեանց Ս.**, Ճանապարհորդություն ի Մեծն Հայաստան, մասն Բ, Տիփլիս, 1858, էջ 309):

³ Շոշը սկզբնական շրջանում եղել է Վարանդա գավառի գյուղերից և պատկանել է Մելիք-Շահնագարյաններին: Ներկայումս գտնվում է Ասկերանի շրջանում, Շուշի քաղաքից 4 կմ հարավ-արևելք՝ Կարկառ գետի աջափնյակում: Նշենք, որ գյուղը Շոշ, Շոշու ավան անվամբ հիշատակվում է միայն Մակար եպս. Բարխուտարեանցի մոտ (տե՛ս **Բարխուտարեանց Ս.**, Արցախ, Բագու, 1895, էջ 228-229, տե՛ս նաև **նույնի** Պատմություն Աղուանից, հ. Բ, Թիփլիս, 1907, էջ 99): Պատմական այլ աղբյուրներում գյուղը ներկայացվում է Շուշու կամ Շուշոյ, Շուշի, Շուշի գյուղ, անուններով (տե՛ս ԺԵ դարի հայերեն ձեռագրերի հիշատակարաններ: Մասն Ա (1401-1450 թթ): Կազմեց **Լ. Խաչիկյան**, Երևան, 1955, էջ 384, տե՛ս նաև **Ջալալեանց Ս.**, Ճանապարհորդություն ի Մեծն Հայաստան, մասն Բ, էջ 244, տե՛ս նաև **Բալայան Վ.**, Շուշի. Տեղն ու դերը Հայոց քաղաքակրթական համակարգում, Երևան, 2017, էջ 51): Ըստ Ս. Սարգսյանի «...Շոշն ու Շուշին համանուն բնակավայրեր են եւ փաստորեն միմյանցից տարբերելու համար է գյուղը Շոշ կամ Շուշի քենդ (Շուշի գյուղ) անունները ստացել» (**Սարգսյան Ս.**, Արցախի բնակավայրերը (ստուգաբանություններ), Երևան, 2018, էջ 47):

⁴ **Լալայեան Ե.**, Չանգեզուր, էջ 8:

մելիք դառնայ...»¹: Նույն խնդրով գյուղացիները դիմում են նաև Մելիք-Շահնազար Բ-ին, որի միջնորդությամբ Ղարաբաղի խառնության հիմնադիր Փանահ Ալի խան Ջևանշիրը (իշխել է 1747-1763 թթ.) Օհանին «Գորիս, Խոտ, Շնհեր, Հալիձոր, Քարահունջ, Ալիդուլիքենդ (Ազատաշեն - Գ. Մ.)², Տաշքենդ (Քարաշեն - Գ. Մ.)³, Մաղանջուղ⁴, Կորուս⁵»⁶ գյուղերի նկատմամբ շնորհում է մելիքական տիտղոս և ժառանգաբար իշխելու իրավունք⁷:

¹ Նույն տեղում, էջ 9:

² Ալիդուլիշեն, Ուրդունիշեն, Աթղունի գյուղը Ազատաշեն է վերանվանվել 1940 թ. (տե՛ս **Հակոբյան Թ., Մելիք-Քալաշյան Ստ., Բարսեղյան Հ.**, Հայաստանի և հարակից շրջանների տեղանունների բառարան (այսուհետ՝ ՀՀՇՏԲ), հ. 1, Երևան, 1986, էջ 40, 85-86): 1898 թ. աշնան վերջերին գյուղ այցելած «Նոր-Դար»-ի գաղաթական թղթակից Տիգրան Խոջա-Թումանյանը ուղեգրական նոթերում գյուղի մասին հայտնում է հետևյալ տեղեկությունը. «Ալիդուլին հայկական գիւղ է՝ ընկած մի փոքրի սարահարթի վրայ արեգուն տեղ: ...ունի 100 ծուխ, մի աղբատ և անշուք եկեղեցի և մի քահանայ» (***) [**Խոջա-Թումանյան Տ.**], Ճանապարհորդական ակնարկներ, «Նոր-Դար», Թիֆլիս, 1899, ապրիլի 10, № 64):

³ Ներկայիս Քարաշեն գյուղն է (տե՛ս ՀՀՇՏԲ, հ. 5, Երևան, 2001, էջ 317-318): Գյուղը հիշատակվում է Տաթևի վանքի 1730 թ. պտղացուցակում և 1781 թ. «Քեթթուկ» մատյանի հարկացուցակում (տե՛ս Մեսրոպ Մաշտոցի անվան հին ձեռագրերի ինստիտուտ-Մատենադարան (այսուհետ՝ Մատենադարան), ձեռ. № 1488, 215ա-215բ, 219բ, տե՛ս նաև Ժամանակագրության **Ստեփաննոսի Օրբելեանի**: Ջրատարակության պատրաստեց **Ա. Աբրահամյանը**, Երևան, 1942 (հավելված), էջ 42:

⁴ Մաղանջուղ, Մահանձու, Մաղանջուխ գյուղը հիշատակված չէ Ստեփաննոս Օրբելյանի հարկացուցակում (հին ցուցակ): Գյուղը «Ջանկագորու գաւառ»-ում *Մաղանձուղ* ձևով առաջին անգամ հիշատակվում է Տաթևի վանքի 1781 թ. «Քեթթուկ» կոչված մատյանի հարկացուցակում (տե՛ս Մատենադարան, ձեռ. № 1488, 219բ): Գտնվել է Գորիս քաղաքից 3-4 կմ հարավ-արևելք (տե՛ս ՀՀՇՏԲ, հ. 3, Երևան, 1991, էջ 658): Ունեցել է Ս. Հռիփսիմե՛ն եկեղեցին: ՀՄՍՀ Գերագույն խորհրդի 1950 թ. ապրիլի 19-ի հրամանագրով բնակավայրը վերանվանվել է Այգեձոր (տե՛ս ՀՀՇՏԲ, հ. 1, էջ 227):

⁵ Կորու, Կյորե, Կյորու գյուղը գտնվել է Գորիս քաղաքից 2 կմ հարավ-արևելք, Խնձորեսկ գյուղից 2-3 կմ հարավ-արևմուտք: ՀՄՍՀ Գերագույն խորհրդի 1950 թ. ապրիլի 19-ի հրամանագրով վերանվանվել է Ջորաշեն (տե՛ս ՀՀՇՏԲ, հ. 3, Երևան, 1991, էջ 486): 1970-1974 թթ. Ջորաշեն, Ազատաշեն (Ալիդուլիշեն) և Այգեձոր գյուղերի միավորմամբ կազմավորվել է Հարթաշեն գյուղը (տե՛ս ՀՀՇՏԲ, հ. 1, էջ 40, 227, տե՛ս նաև ՀՀՇՏԲ, հ. 3, էջ 386):

⁶ **Լալայեան Ե.**, Ջանգեգուր, էջ 9:

⁷ Տեղին է նշել, որ իրավական առումով գոյություն ունեին երեք կարգի մելիքներ: Առաջին կարգին պատկանում էին այն մելիքները, ովքեր իրենց արտոնված դիրքը կա՛մ ժառանգում էին իրենց նախնիներից, կա՛մ թե ստանում էին պարսից շահերի ֆերմաներով: Նրանք ազատ էին ամեն տեսակ հարկերից: Երկրորդ կարգի

Այսպիսով՝ հանձին Մելիք-Օհանի, Ղարաբաղի խանության կազմում Սյունյաց Հաբանդ գավառում հիմնվում է մի նոր մելիքություն¹:

Մեր ձեռքի տակ եղած աղբյուներում Օհանի՝ մելիքական տիտղոսի շնորհման ստույգ թվականի մասին ուղղակի վկայություններ չկան: Սակայն դատելով իրադարձությունների ժամանակագրական հաջորդականությունից՝ այն պետք է, որ տեղի ունեցած լիներ XVIII դ. 50-ական թվականների վերջերին: Եվ ուրեմն այս ժամանակահատվածը պետք է ընդունել Գորիսի մելիքության պատմության սկիզբ, որովհետև, որքանով այդ թույլ են տալիս վավերագրերի տվյալները, դրանից ավելի վաղ չեն հիշատակվում ոչ միայն մելիքությունը, այլ նաև մելիքները: Արդ՝ Մելիք-Օհանին պետք է վերագրել Հաբանդ գավառում Ղարաբաղի խանությանը ենթակա մի նոր մելիքության հիմնադրի իրավունքը: Դրանով իսկ Մելիք-Օհանը իրավամբ վաստակել է «Մեծ» պատվանունը, որն արձանագրված է նրա տապանաքարին²: Ընդամին՝ մելիքական տիտղոս ստացած Օհանը Սյունիքում հիմք է դնում մելիքական մի նոր տոհմի՝ Օհանյանների և

մելիքներն իրենց իրավունքները ստանում էին խաներից: Երրորդ կարգի մելիքները նրանք էին, ովքեր ժամանակավոր կառավարում էին համայնքները և խաներից անգամ հրովարտակ չունեին ստացած (տե՛ս **Լեռ**, Հայոց պատմություն, հ. Գ, գիրք Ա, Երևան, 1969, էջ 81): Արդ՝ Փանահ Ալի խանից մելիքական տիտղոս ստացած Մեծ Մելիք Օհանը դասվում էր երկրորդ կարգի մելիքների շարքը: Հատկանշական է, որ նորահաստատ այդ մելիքությունը ևս ձեռք էր բերել մելիքական տիտղոսին ժառանգաբար տիրելու իրավունք: Սակար եպս. Բարխուտարյանցի պարզաբանմամբ. «Ժառանգական էր հարազատ մելիքություն: Երբ վախճանում էր մելիք հայրն, գահակալում էր նորա անդրանիկ որդին, իսկ երբ, անչափահաս էին լինում անդրանիկներն կամ անհամապատասխան մելիքություն, գահակալում էին վախճանուածների կարող և արժանատր եղբայրներից յարմարագոյններն և կամ չափահաս որդիներն: Անդրանիկներն անյարմար եղած դեպքում թողնում էին գահակալությունը իւրանց փոքր, ընդունակ և կարող եղբարց» (**Բարխուտարեանց Ս.**, Պատմություն Աղուանից, հ. Բ, էջ 9):

¹ Գորիսի մելիքության և Հին ու Նոր Գորիսների տեղադրության մասնաբանական քննությունը տե՛ս **Ստեփանյան Գ.**, Սիմեոն Տեր-Սինայայան. մանկավարժն ու հրապարակախոսը (Գորիսի պատմության դրվագներ), Երևան, 2019 (ձեռագրի իրավունքով):

² Տե՛ս **Ստեփանյան Գ.**, Գորիս (դաշտային հետազոտական նյութեր (այսուհետ՝ ԴՀՆ), (2011-2012 թթ.), տետր № 2, էջ 5:

նրանից սերված Հուսեինյանների, որոնց և վիճակված էր մեծ դեր խաղալ Հաբանդ-Չագեձոր գավառի ուշ միջնադարի և հետագա ժամանակների պատմության քառուղիներում: Ուրեմն վերը նշված հավաստի տեղեկությունների հենքի վրա մերժելի պետք է համարել Գորիսի պատմությունը հեղինակած դոցենտ Ս. Հախվերդյանի այն տեսադրույթը, թե իբր «...Գորիսի Մելիք-Օհանը իր իրավունքները վերահաստատել է Իբրահիմի հոր՝ Փանահ խանի մոտ»¹:

Ս. Հախվերդյանի առաջ քաշած դրույթը քննություն չի բռնում մեր հետևյալ փաստարկներով: Նախ՝ Օհանի՝ նախքան Արցախի Չանախչի գյուղում հանգրվանելը և մելիքական տիտղոս կրելու իրողությունը չի փաստվում մատենագրական ոչ մի սկզբնաղբյուրով և վիմական արձանագրությամբ: Երկրորդ՝ էթե մի պահ ընդունենք, որ Օհանը վերահաստատել է իր տոհմի՝ հնուց եկող մելիքական իրավունքները, ապա նա մելիքական տիտղոսը պետք է որ ձեռք բերած լիներ ժառանգական իրավունքով²: Ըստ այդմ՝ նախ՝ պետք է մելիք լիներ տոհմի նահապետ Մկրտիչը, այնուհետև՝ որդին՝ Ղազարը, սրա որդին՝ Լալան, և ապա՝ վերջինիս որդի Բաղրը (Օհանի հայրը): Մինչդեռ վերջիններիս արձանագիր տապանաքարերին իսպառ բացակայում է պատվավոր **մելիք** բառը, ուստի միանգամայն ակններև է, որ Օհանը ոչ թե վերահաստատել է իր մելիքական իրավունքները, ինչպես սխալմամբ կարծում է Ս. Հախվերդյանը, այլ նոր է ստացել մելիքական տիտղոս՝ համարվելով մի նոր մելիքության հիմնադիր:

Վերադառնանք, սակայն, Մեծ Մելիք-Օհանի հետագա գործունեությանը: Այսպես, մելիքական տիտղոս ստացած Օհանը վերադառնում է Արցախից և իր ժողովրդով նախապես բնակություն հաստատում Ծակերի ձորում³: Մելիք-Օհանի՝ պատմական և հնամենի Գորիս-Կյորեսում չվերահաստատվելը ամենայն հավանականությամբ պայմանավորված էր հետևյալ գործոններով: Նախ՝ վաչկատուն թերեքեմենների ասպատակության

¹ Հախվերդյան Ս., նշվ. աշխ., էջ 162:

² Տե՛ս Բարխուտարեանց Ս., Պատմութիւն Աղուանից, հ. Բ, էջ 9:

³ Տե՛ս Լալայեան Ե., Չանգեզուր, էջ 9, տե՛ս նաև Լիսիցյան Ս., Չանգեզուրի հայերը, Երևան, 1969, էջ 59:

Ժամանակ կոտորածից մազապուրծ համագյուղացիների մի որոշ մասը տակավին ապաստանել էր Ծակերի ձորում, երկրորդ հայրենի գյուղի պաշտպանության համար անբարենպաստ դիրքի պատճառով: Մելիք-Օհանի Ծակերի ձորում նախապես բնակություն հաստատելը վկայում է նրա կողմից ձորի հյուսիսային մասում՝ Կամի ձորակում, Շոր ջուր վտակի աջ ափին, իր և ծնողների, մասնավորապես հոր Բաղրի հիշատակին կառուցած ոչ մեծ բազիլիկ եկեղեցու¹ բարավորի հետևյալ արձանագրությունը.

«ՅԻՇԱՍՏԱՅ Է Է ԵԿԵՂԵՑԻՍ ՄԵԼԻՔ/ՈՉԱՆԻՆ ԵՒ ԻՒՐ /ՕՍՈ-ՂԱՑՆ ՊԱՂԸՐ/ԻՆ. ԹՎԻՆ: ՈՍԺԴ: (1765)»²:



Ծակերի ձորում Մեծ Մելիք-Օհանի կառուցած եկեղեցու շինարարական արձանագրությունը

Այս իրողությունները հավաստվում են Ա. Բակունցի «Կյոբես» վիպակում տեղ գտած արժեքավոր հետևյալ տեղեկությամբ. «Վաղ ժամանակ Շենում՝ հին Կյոբեսում (Նոր կամ Ներքին Գորիսը – Գ. Մ.), ապրել է մի մարդ, անունն Օհան: Այն ժամանակ Շենն այժմվա ձորերում չէր, այլ ավելի հյուսիս, այնտեղ, ուր ձորի մեջ (իմա՝ Ծակերի ձորում – Գ. Մ.) երևում է մի կոտրած վանք, որի ճակատաքարին դեռևս կարդացվում է.

¹ Եկեղեցին գտնվելով Ծակերի ձորի Կամի ձորակում՝ տեղի բնակիչներին հայտնի է եղել նաև «Կամի վանք» անունով (տե՛ս ՀԱԱ, ֆ. 1063, ց. 1, գ. 1545, թ. 63): 2012 թ. նոյեմբերին մեր այցելության ժամանակ եկեղեցին գտնվում էր ամբողջովին ավեր վիճակում:

² **Լալայեան Ե.**, Չանգեզուր, էջ 30: Հմմտ. Դիվան հայ վիմագրության: Պրակ II: Գորիսի, Միսիանի և Ղափանի շրջաններ: Կազմեց՝ **Ս. Բարխուդարյան**, Երևան, 1960, էջ 80: ՀԱԱ, ֆ. 1063, ց. 1, գ. 1426, թ. 24-ի շրջերես:

«...Թիւ ՌԺԴ (1565) ... Ես Մելիք Էգան կառու(ցի)...»¹: Այս ուշարժան հիշատակումից հետո Ա. Բակունցը Էջատակի ծանրագրության մեջ հավելում և որոշակիորեն տեղորոշում է նաև մատնանշած ձորը. «Ղաթրինի ձորից հյուսիս, երրորդ ձորում, որտեղ մնում են անհայտ գյուղի քարայրները և կոտրած վանքը...»²: Հետևելով նշված տեղորոշմանը դժվար չէ նկատել, որ բնակավայրի առավել հավանական տեղը կարող է համադրվել Ղաթրինի ձորից հյուսիս՝ Չոփչուն ձորի, այնուհետև՝ Թանգուն ձորին հաջորդող Ծակերի ձորի լքյալ գյուղատեղիի և Մեծ Մելիք-Օհանի կառուցած եկեղեցու հետ, որը «Կյորես» վիպակը գրելու ժամանակ (1935 թ.) արդեն իսկ գտնվում էր խարխուլ վիճակում: Այսպիսով՝ ակնհայտ է, որ Ա. Բակունցի մեջբերած արձանագրությունը վերաբերում է Մեծ Մելիք-Օհանին և նրա կողմից Ծակերի ձորում իր և ծնողների, մասնավորապես՝ հոր՝ Բաղրի հիշատակին կառուցած եկեղեցուն: Ինչ վերաբերում է *Էգան* անձնանվանը, ապա նկատենք, որ խոսքն այստեղ Մեծ Մելիք-Օհանի մասին է: Նախընթացում արդեն անդրադարձանք Հովհաննես անձնանվան գրության տարբերակներին, ուստի այստեղ վկայաբերենք միայն Բաֆֆու «Դավիթ-բեկ» վեպում տված այն հստակ պարզաբանումը, որ «Ավան, Էգան Օհան բառերը Հովհաննես հատուկ անվան աղճատվածներն են այունեցիների բարբառում»³: Ցավոք, Ա. Բակունցի՝ եկեղեցու բարավորի արձանագրության ոչ ճշգրիտ և էական բացթողումներով արտագրությունից թվականի Ռ տառից հետո դուրս է մնացել Մ տառը, ինչի հետևանքով 1765-ը դարձել է 1565:

Արդ, հանրագումարի բերելով վերը նշված աղբյուրագիտական արժանահավատ տեղեկությունները, հանգում ենք հետևյալ եզրակացության. Մելիք-Շահնագար Բ-ի միջնորդությամբ Փանահ Ալի խանից մելիքական տիրադոս ստացած Օհանը Արցախից վերադառնալուց հետո, վաչկատուն ցեղերի հետագա

¹ **Բակունց Ա.**, Կյորես, Ընտրանի, Երևան, 2009, էջ 384:

² Նույն տեղում:

³ **Բաֆֆի**, Երկերի ժողովածու, հ. 6, Երևան, 1963, էջ 267:

ասպատակություններին դիմագրավելու նպատակով նախապես ապավինել է բնական պաշտպանական հնարավորություններով ավելի հարմար վայրին՝ Ծակերի ձորին: Այդ է փաստում միջնադարյան Հայաստանում նոր բնակավայրերի հիմնադրման սկզբունքը, երբ բնակչության համար ստեղծված անապահով վիճակն իշխանական տոհմերի առաջնորդներին հարկադրել է թողնել իրենց երբեմնի բարեկարգ բնակավայրերը և վերաբնակվել ապահով լեռնավայրերում՝ կիրճերի, ժայռածեբլերի ու ձորալանջերի բնական քարայր-ապաստարաններում կամ անհրաժեշտության դեպքում ստեղծել թաքստոց-ամրոցներ¹:

Մելիք-Օհանը չհիմնավորվեց Ծակերի ձորում: Որոշ ժամանակ անց, երբ Չագեձորի հովտին այլևս չէին սպառնում թերեքեմե վաչկատուն ցեղերի ասպատակությունները, Մելիք-Օհանն իր և ծնողների հիշատակին եկեղեցի կառուցելուց հետո՝ որոշ ժամանակ անց (թերևս 1760-ական թվականների վերջերին), իր ժողովրդով մշտական բնակության վայր է ընտրում Չագեձորի հովտի Լաստի խութ լեռան հյուսիսային լանջերն ակոսող ձորամիջում նախկինում գոյություն ունեցած բնակատեղին և հիմնում Նոր կամ Ներքին Գորիս (Ներքին Շեն) գյուղը և այն դարձնում նորահաստատ մելիքության գլխավոր նստոց-կենտրոն: Ինչպես ասվում է Հակոբ քին. Տեր-Մինայանի ինքնագիր «Հիշատակարան»-ում, «Թէ որ թվում, որ ժամանակ ինձ յայտնի չէ, Ծակերին ծորիցը փոխում են այժմեան Գորիս գիւղը, է հարկէ Նոր գիւղ քցում, այդ յայտնի է այս գիւղի Ս. Հռիփսիմէ եկեղեցոյ կանգնեցնելուց»²: Այդ է փաստում նաև Մանուշար բեկ Մելիք-Հունեխյանի ներկայացրած պատումը, համաձայն որի Մելիք-Օհանը «...բնակութիւն է հաստատում նախ «Ծակերի ձորում», բայց յետոյ հիմնարկում է Նոր-Գորիս գիւղը³ և այնտեղ տեղափոխում»¹:

¹ Տե՛ս **Գրիգորյան Գ.**, Գյուղական նոր բնակավայրերի հիմնումն ու բնակչության վերաբնակեցումը միջնադարյան Հայաստանում (Հայաստանի պատմական ժողովրդագրության հիմնահարցեր. Հայկական լեռնաշխարհը հայ էթնոսի բնօրրան: Հայագիտական գիտաժողով (գեկուցումների հիմնադրություն), Երևան, 2004, էջ 39-40:

² ՀԱՍ, ֆ. 798, ց. 1, գ. 1220, թ. 137:

³ Տարածամանակյա աղբյուրները վկայում են այն մասին, որ տակավին XVIII դ. վերջերից նորահիմն Գորիս գյուղից որոշ ընտանիքներ հետզհետե վերահաստատվել են պապենական Գորայք-Գորիսում և որպես նվիրական վայր վերահիմնարկել ավեր-



**Գորիս-Կյորես գյուղի համայնապատկերը. XIX դարասկիզբ:
Նեղ. Է. Ռեկյու.**



**Գորիս-Կյորես գյուղի համայնապատկերը. 1890 թ.:
Նեղ. ֆրանսիացի ազգագրագետ Բ. Շանթթ**

Վերոբերյալ դեպքերի վավերականությունը հավաստվում է տեղագիր-հեղինակների հիշատակումներով²: Այսպես, 1841 թ.

ված հին գյուղը: Ասպատակության հետևանքով քարուքանդ արված Չագեձորի հովտի հնարմատ գյուղը դժվարին պայմաններում բռնում է վերականգնման ուղին: Արդյունքում համանուն երկու բնակավայրերն իրարից տարբերելու համար տեղի բնակիչները պատմական գյուղը կոչել են Հին Գորիս կամ բարբառային ձևով՝ *Յերի Շեն* (Վերին Շեն)՝ ի տարբերություն Լաստի խութ լեռան ստորոտում հիմնված Գորիսի, որին համապատասխանաբար տրվել են Նոր կամ Ներքին Գորիս՝ Ներքին Շեն անվանումները:

¹ **Լալայեան Ե.**, Չանգեզուր, էջ 9:

² Ժամանակագրական կարգով վկայաբերենք Սյունիքում, այդ թվում նաև Վարարակնի հովտում շրջագայած ճանապարհորդ-տեղագիրների հաղորդումները: Այսպես՝ ժամանակի ճանաչված մտավորականներից Սիմեոն Շահվերդյանցը, ով հետագայում դասավանդել է Գորիսի պետական (արքունի) ուսումնարանում, «Նոր-Դար»-ի 1887 թ. հոկտեմբերի 16-ի համարում տպագրած «Ճանապարհորդական

նկատողություններ» վերտառությամբ փաստառատ ուղեգրական նոթերում գրում է. «Գեօրեքը երեք կողմից բոլորովին պատած է բաւականին բարձր սարերով... Հիւսիսային կողմը գտնվում է միւսներից բարձր մի սար (Եփնոց լեռ - Գ. Մ.), որ կարծես գիւղը պաշտպանում է հիւսիսային սառնամանիքներից, բայց ինքն եւս պակաս ցրտեր չէ ուղարկում դէպի գիւղ: Այս սարի ստորոտին մօտիկ, գետակի վերայ գտնվում է Հին Գեօրեքը, որտեղից բնակիչները տեղափոխուել և հիւնել են այժմեան Գեօրեքը (ընդգծումը մերն է՝ Գ. Մ.), իսկ հին տեղը գտնվում են գիւղացիների ձմեռուայ գոմերը» («Մշակ», Թիֆլիս, 1902, յունվարի 25, № 17):

Ս. վրդ. Ջալալյանցից շուրջ 47 տարի անց, 1888 թ. հոկտեմբերի սկզբներին Ջագեձորի հովտում շրջագայած Լեոն, որի պրպտող հայացքից չի վրիպել Հաբանդ գավառի հինավուրց ու նշանավոր Գորայք-Գորիսի տեղադրությունը, ուղեգրական նոթերում գրում է. «Գորիս գնալուց երեք օր յետոյ մենք ձի նստեցինք ու գնացինք Հին-Գորիս անունով տեղը, որ գտնվում է այժմեան Գորիսից դէպի արևմուտք, այն լեռնային բարձրութեան մօտ, որ... արևմուտքից փակում է Գորիսի ձորը: ...**Հին ժամանակներն այստեղ է եղել բուն գիւղը, որ չը գիտեն, թէ ինչու է թողել այս տեղը, գնացել է տեղադրուել ներքևում, բիզ-բիզ քարերի տակ** (ընդգծումը մերն է՝ Գ. Մ.)» (Լեո, Իմ յիշատակարանը, (տեղեկություններ մեր սարերից ու ձորերից): Միւսիքից մի անկիւն, Շուշի, 1890, էջ 76-77):

Տեղագրական բնութի մյուս աղբյուրը Ղ. Ալիշանի «Միսական» մեծարժեք աշխատությունն է, որում հեղինակը Ջագեձոր բերդի տեղադրության ասնչությամբ ուրշակիորեն մատնանշում է, որ բերդը գտնվել է Հին Գորիսի սահմանին, նոր ավանից երեք մղոն հյուսիս արևմուտք: Այդ մասին նա հիշատակում է. «...Ջագեձորոյ բերդ... և հաւանելի է լինել ի սահմանս հնոյն Կորէսի, որ կայ առ եզերք ջրոյն յաջմէն իբր երիւք մղոնօք ի Մ.[յարեւմուտս] Հս.[հիւսիսոյ] նորոյ աւանին...» (Ալիշան Ղ., Միսական: Տեղագրութիւն Միւնեաց աշխարհի, Վենետիկ, 1893, էջ 261): Ղ. Ալիշանը Ջագեձոր բերդի տեղադրությունից անմիջապէս հետո անդրադառնում է նաև Ջագեձորի հովտի երկու Գորիսների տեղադրության հարցին և ընդգծում, որ Գորայք նախնական ձևից առաջ եկած «Կորէս» կամ «Գորիս» անվամբ բնակավայրերից «...մին կռչի Հին և է վերոյ նշանակեալն (իմա՝ «հնոյն Կորէս»-ը - Գ. Մ.), ի ստորոտլէրին ի բարեղիր և անուշող վայրի. այլ իբրու ոչ ըստ բաւականին անբոյթ»՝ լքեալ ի բնակչացն՝ ոչ չգիտեն երբ: Երկրորդն և այժմ գլխաւոր աւան, նաև քաղաքաւան բովանդակ գաւառին, Կորէս կամ Կորուս կամ Գորիս, որ և Ջանկեազօր, երկու մղոնաւ կամ աւելի յարեւելից հարաւոյ կայ առաջնոյն, երկուսին ափունս կարկաջահոս և սրընթաց Ջագեձորոյն...» (նոյն տեղում): Տեղագրությունն ու նկարագրությունը միանգամայն ընկալելի է: Մակայն այստեղ պետք է նկատի ունենալ այն հանգամանքը, որ Ղ. Ալիշանի «Միսական»-ը գրելու ժամանակաշրջանում (XIX դարի 80-ական թվականների վերջեր) «Կորէս» կամ Գորիս «քաղաքաւանն» արդէն ներառում էր Լաստի խութ լեռան հյուսիսային լանջերն ակոսող ձորամիջում գտնվող Գորիս գյուղն ու տափարակում 1870 թ. հիմնված գավառակենտրոն Գորիսը: Ասվածի խոստն վկայությունն է Գորիսի ծխատեր քահանաներ Հակոբ քին. Տեր-Հակոբյանի, Գարեգին քին. Տեր-Մինայանի և Դանիել քին. Տեր-Դավթյանի՝ «Գաւառ» շաբաթաթերթին 1910 թ. մարտի 29-ի հղած նամակում 1883 թ. իրադարձություններին վերա-

ամռանը վիմագրական նյութեր հավաքելու նպատակով Գորիս գյուղ այցելած Սանահինի վանքի վանահայր երախտաշատ Սարգիս վրդ. Ջալալյանցն իր «Ճանապարհորդութիւն ի Մեծն Հայաստան» ճամփորդական-տեղագրական մեծարժէք աշխատության «Կորիս» վերտառությամբ ենթագլխում գրում է. «Բնակիչք տեղոյս յերկիրդ է հանապազօրեայ արշաւանաց ի զանազան թշնամեաց՝ ի վաղուց անտի լքեալ թողին զգիրդն Կորիս, որ ի ստորոտ լերին յարևմուտս հիւսիսոյ ի պատուական տեղուց, և

բերող հետևյալ տեղեկությունը. «...Գորիս ւանը, որի տակ հասկացում էր այժմայն քաղաքամասը և գիւղամասը...» («Գաւառ», Գորիս, 1910, ապրիլի 4, № 14):

Ավելորդ չենք համարում վկայաբերել նաև Արցախի թեմի առաջնորդ Գրիգոր արքեպս. Սագինյանցի՝ 1886 թ. հուլիսի սկզբներին պաշտոնական գործերով Տաթևի վանք մեկնելու ժամանակ նրա ուղեկցությամբ Ջանգեզուրի գավառում ճանապարհորդած անվանի բանահավաք, մանկավարժ, հոգևոր-հասարակական գործիչ Եղիշե քին. Գեղամյանցի (Հայկունի)՝ «Ուղեգնացական ակնարկներ» վերտառությամբ նոթերի տեղեկությունները, որոնք լույս են սփռում խնդրո առարկա հարցի վրա: Այսպես՝ Շուշիից հուլիսի 5-ին հասնելով գավառակենտրոն Գորիս, Տաթևի վանք մեկնելուց առաջ, Գորիս գյուղի իր տանը նրանց հյուրընկալել և զիջերակացով ապահովել է մեծահարգ Մանուշար բեկ Մելիք-Հունեինյանը: Նա Եղիշե քին. Գեղամյանցի հետ գրույցում փաստագրական կարևոր տեղեկություններ է հաղորդել գյուղի պատմության մասին, որոնց հիման վրա վերջինստեղագրական նոթերում արձանագրել է հետևյալը. «**Գեօրիս գիւղը առաջ հովտի աւելի բարձրումն էր գտնվում և ուներ 700 տուն: Նրա ւաւերակները հիմայ էլ կան** (ընդգծումը մերն է՝ Գ. Մ.): Այժմեան գիւղի հանդէպ, գետի աջ ափի վրայ, 1869 թուից մի քաղաք (Գեօրիս) է ձգուած, որ ողջ Ջանգեզօրի գաւառական քաղաքն է...» (**Հայկունի [Եղիշե ավ. քին. Գեղամյանց], Ուղեգնացական ակնարկներ (II), «Մեղու Հայաստանի», Թիֆլիզ, 1886, օգոստոսի 10, № 45):**

Հիշատակենք նաև հետևյալ վավերական փաստը, ինչն ամբողջացնում է մեր եզրահանգումները: Հայ ազգային-ազատագրական շարժման նշանավոր գործիչ, ծնունդով (ծնվ. 1878 թ.) Նոր կամ Ներքին Գորիս գյուղից Հովհաննես Պարոնյանի (Յապոն) հուշերում ասվում է. «Ձագաձորը հայ աշխարհի այն բախտաբու ու բացառիկ պատասխիկներից է, որ սկզբից եղել ու մտնում է գուտ հայկական: Հովիտի յատակը քերող Գորիս գետի աջ ու ձախ ափերին վերից վար շարուած են Բուռուն, Հին (կամ Վերին) Գորիս, Ներքին (կամ Նոր) Գորիս գիւղերը, Գորիս քաղաքը ու Քարահունջ գիւղը, բոլորն էլ հայկաշէն ու հայաբնակ: Սրանցից Հին ու Նոր Գորիսները հովիտի ամենահին ւաւաններն են, իսկ սրանցից **Հին Գորիսի պատմութիւնը գնում հասնում է Միւնեաց Աշխարհի շատ հեռու շրջանները** (ընդգծումը մերն է՝ Գ. Մ.)» (Յապոնի (Յովհաննէս Պարոնեան) յուշերը: Գրեց՝ Տերունի Յ. [Հակոբ Տեր-Պողոսյան], «Հայրենիք», Պոսթըն, 1940, ԺԹ տարի, դէկտեմբեր, № 2, էջ 114):

յօժարեցան բնակիլ աստանօր վասն ամրութեանն»¹: Ընդամին՝ Մելիք-Օհանին պետք է վերագրել ոչ միայն Հաբանդ գավառում Ղարաբաղի խանությանը ենթակա մի նոր մելիքության, այլ նաև մելիքության նստավայր կենտրոնի՝ Նոր Գորիսի հիմնադրի իրավունքը:

Մեծ Մելիք-Օհանը ենթարկվում էր Փանահ Ալի խանին և իր գործունեությամբ հաշվետու էր նրան: Որպես մի նոր մելիքության հիմնադիր՝ նա օժտված էր մելիքական իրավունքներով և իրականացրել է բոլոր այն գործառույթները, որոնք սահմանված էին ինչպես Արցախի, այնպես էլ Սյունիքի մելիքների համար, այն է՝ հարկահավաքում, դատավարություն, կարգի պահպանում, զինվորագրում և այլն²: Որպես կանոն՝ մելիքը կրում էր իշխանության խորհրդանիշ, ունեցել է իր կնիքը՝ կեռ սուր, վրան գրված «Քսի [Քրիստոսի] ծառայ մելիք... (անունը)»³: Մելիքն իրեն ենթակա յուրաքանչյուր գյուղում նշանակում էր

¹ **Ջալալեանց Ս.**, նշվ. աշխ., մասն Բ, էջ 309: Աշխարհաբար թարգմանությամբ. «Տեղի բնակիչները, զանազան թշնամիների մշտական արշավանքների վախից, վաղուց լքեցին [հին] Կորիս գյուղը, որ [գտնվում է այստեղից] հյուսիս արևմուտք, լեռան ստորոտի մի պատվական տեղում և [այս վայրի] ամրության պատճառով, համաձայնեցին բնակվել այստեղ» (**Մարգին արքեպիսկոպոս Ջալալեանց**, Ճանապարհորդություն ի Մեծն Հայաստան, մաս Ա, Բ: Գրաբարից աշխարհաբար թարգմանությունը և ծանոթագրությունները՝ **Ս. Գրիգորյանի**, Երևան, 2016, էջ 491):

² Բնակչությունը մելիքի նկատմամբ կատարում էր հետևյալ պարտավորությունները. յուրաքանչյուր տնից մեկ ոսկի՝ խանին ուղարկելու համար, տասանորդ՝ հացահատիկից և խոտից, մի-մի բեռ փայտ, որը պետք է բերվեր սեփական ձիով և ջորիով, յուրաքանչյուր երեք ընտանիքից՝ մի գույթան մելիքի հողերից մի օրավար վարելու համար: Գյուղացիները պարտավոր էին մելիքի հողերը վարել, ցանել, հնձել, կրել և այլն, գյուղացիներից մեկ տարով մելիքը ստանում էր վարձած ձիապան, խոհարար, ծառա և աղախին: Կանայք պետք է լվանային, զգեին և մանեին մելիքի բուրդը, ինչպես նաև հավաքեին նրա այգիների միրգը: Նավասարդին (Նոր տարի) յուրաքանչյուր տան մեծը մի խնձորի մեջ արծաթ, երբեմն էլ ոսկի դրամ ցցած շնորհավորում էր մելիքի տունը՝ բերելով և մի կուպ գինի և մի շիշ օղի: Հարսանիքի թույլտվություն խնդրելու համար՝ նախօրյակին նորափեսայի հայրը քավորի հետ միասին մելիքին տանում էր մի կուծ գինի, մի շիշ օղի և եզան սուկին (տե՛ս **Լալայեան Ե.**, Չանգեզուր, էջ 15, տե՛ս նաև **Շիրաքուսի Ն.**, Зангезурский уездъ Елизаветпольской губернии (гл. VII, Бывшие армянские мелики). Сборник материалов для описания местностей и племен Кавказа, вып. XXXIV, Тифлис, 1904, отд. I, с. 202-204, տե՛ս նաև **Լիսիցյան Ս.**, Չանգեզուրի հայերը, Երևան, 1969, էջ 64):

³ **Լալայեան Ե.**, Երկեր, հ. 2, Երևան, 1988, էջ 252:

տանուտեր: Սա կատարում էր մելիքի հրամանները, իր զզիրի հետ հավաքում էր հարկը, կազմակերպում էր փոքրիկ դատեր և այլն¹: Մելիքը խանի նկատմամբ ունեցել է հետևյալ պարտավորությունները. «1. Շահի կամ խանի պատերազմ գնացած միջոցին, օգնութեան գնալ, զինելով իրենց վիճակի իւրաքանչիւր տնից մի մարդ: 2. Իւրաքանչիւր տնից մի ոսկի (երեք բուրլի) առնելով՝ ուղարկել խանին, որպէս շահին հասանելի հարկ»²:

Մեծ Մելիք-Օհանն անտարակույս եղել է քաջակորով անձնավորություն և աչքի ընկնող դեր է խաղացել Սյունիքի հասարակական-քաղաքական և հոգևոր կյանքում: Նրա ձեռնարկած շինարարական-կառուցողական աշխատանքները նախ սկսվում են մելիքական նստոցի՝ ապարանքի (ամարաթ) կառուցմամբ, որը պետք է լիներ ինչպես հարկն է լավ պաշտպանված: Հայտնի է, որ մելիքական ապարանքները սովորաբար շինվում էին հարմարավետ վայրերում՝ բնակավայրի կենտրոնական մասում, կոպտատաշ և սրբատաշ քարից, բաղկացած մի քանի թաղակապ քարայր «դարադամներից» (գլխատուն, մեծ տուն): Ներկայումս Գորիս գյուղի (Նոր կամ Ներքին Գորիս) կենտրոնում՝ Ս. Հռիփսիմե եկեղեցուց փոքր-ինչ հեռու, գտնվում է Մեծ Մելիք-Օհանի կողմից հիմնարկված, հետագայում մելիք կարգված նրա որդիներից մեկի՝ Հուսեինի անունով հայտնի Մելիք-Հուսեինյանների մելիքական երկհարկ ապարանքի ավերակը³:

¹ Տե՛ս **Լալայեան Ե.**, Ջանգեզուր, էջ 15:

² Նույն տեղում:

³ Տե՛ս ՀԱԱ, ֆ. 1063, ց. 1, գ. 1545, թ. 32: «Պատմական հուշարձանների պահպանության կոմիտե»-ի (այսուհետ՝ ՊՀՊԿ)-ի Գորիսի շրջանային հրահանգիչ Գ. Բաղդասյանի 1939 թ. հեղինակած «Տեղեկություններ Գորիսի շրջանի հին հուշարձանների մասին» հաշվետվության մեջ արդեն իսկ կիսաքանդ ապարանքը նկարագրվում է. «Գտնվում է գյուղի մեջի մահլում՝ ուղիղ եկեղեցու գլխին, դեպի հյուսիս-արևմուտք, Չագեձոր բերդի ժայռերի տակ: Այս բնակարանն ունի ընդհանուր մեծ մուտք, որի կողքին շինված է մելիքի դիվանատունը, որտեղից մելիքը դուրս է եկել և հրապարակավ դատեր ու վճիռներ կայացրել: Դիվանատունը կիսավեր է, մնում է մի պատ, որի վրա երևում է ծեփի հետքը: Դիվանատան մոտի մուտքը տանում է մի թաղակապ միջանցք, որի հյուսիսային կողմում գտնվում է մելիքի անձնական սենյակը, խիստ ապահով, ամուր և քարե սիրուն կամարով, այս հոյակապ սենյակի առաջին պատը, դռներն ու պատուհանը ավերված են, սենյակը ծեփված է եղել, այժմ թափված է: Մելիքի սենյակի հյուսիսային կողմում գտնվում է գեղեցիկ բուխարին՝ ճարտարապետական գեղեցիկ քանդակված

Մեծ Մելիք-Օհանը ոչ միայն հայրենասեր ու քաջարի զինվորական էր, այլև ազգային ավանդույթների կրող ու շարունակող: Նրա շինարարական գործունեության հաջորդ ձեռնարկը եկեղեցաշինությունն էր: «Խաչերի ձոր» թաղում փոքրիկ բլրալանջի վրա, 1776 թ. նա կառուցում է Ս. Հռիփսիմե եկեղեցին¹:

բուխարու շուրջքարով... ննջարանի (նաև առանձնասենյակի) հյուսիսային կողմը գտնվում է դարադարը, որը մի մեծ սենյակ է, մեջին չորս քարե սյուներ, որոնց վրա է կառուցվել վերնաշենքը՝ ամբողջովին փայտից: Մենյակն ու քար սյուներն էլ այժմ անվթար են, քանդված է միայն առաջահայաց պատը, դուռը և քարերը (սրբատաշ) տարված են» (ՀԱԱ, ֆ. 1063, ց. 1, գ. 368, թ. 5-6):

¹ Մեզ հայտնի առաջին աղբյուրը, որտեղ եկեղեցին նշված է Ս. Հռիփսիմե, եկեղեցու 1851 թ. վերաբերող ծխական մատյանն է. «Չավաբերական մատեան տուեալի հոգեւոր Կառավարութենէ Հայոց Տաթևու սուրբ Հռիփսիմէ եկեղեցոյն Կորիս Գեղջ, յաղագս գրելոյ, ի սմին գՕՄնեալս, զՊսակեալս, զՆնջեցեալս: Յընթացս 1851 ամի» (ՀԱԱ, ֆ. 47, ց. 1, գ. 693, թ. 2): Այդ անվամբ են հիշատակում նաև տեղագիր-հեղինակներից Ղ. Ալիշանն (տե՛ս **Ալիշան Ղ.**, Միսական: Տեղագրութիւն Միւնեաց աշխարհի, Վենետիկ, 1893, էջ 262) ու Մ. Էփրիկյանը (տե՛ս **Էփրիկեան Ս.**, Պատկերագրող բնաշխարհիկ բառարան, Կ. Ա, գիրք Ա, Վենետիկ, 1903-1905, էջ 525), ավելի ուշ նաև՝ Հակոբ քնն. Տեր-Մինասյանն իր տոհմի մասին 1919 թ. հունվարին հեղինակած «Հիշատակարան»-ում (տե՛ս ՀԱԱ, ֆ. 798, ց. 1, գ. 1220, թ. 137) և 1926 թ. Սյունյաց թեմի և Տաթևի վանքի առաջնորդ Արտակ եպս. Սմբատյանցը (տե՛ս Վավերագրեր Հայ եկեղեցու պատմության, գիրք Գ, Արտակ եպիսկոպոս Սմբատյանց (Տավուշեցի), հոգևոր, գրական, պատմաբանասիրական գործունեությունը և գնդակահարությունը (1876-1937 թթ.), կազմեց՝ **Ս. Բեկբոյան**, Երևան, 1997, էջ 310):

Եկեղեցին իր ճարտարապետական ոճով միանավ բազիլիկ է: Կառույցի հորինվածքի և շինարվեստի վերաբերյալ թերևս առաջին հիշատակությունը թողել է 1841 թ. ամռանը Գորիս գյուղ (Նոր կամ Ներքին Գորիս) այցելած Ս. վրդ. Ջալալյանցը. «Ունին զազգաշեն եկեղեցի (թաղածածկ - Գ. Ս.), կառուցեալ յանհարթ և ի կոփածո քարանց...» (**Ջալալեանց Ս.**, նշվ. աշխ., մասն Բ, էջ 309): Եկեղեցու մասին կարճ տեղեկություն է պահպանված նաև Ե. Լալայանի մոտ. «Գիւղի կենդրոնում գտնուում է հին, հասարակ եկեղեցին...» (**Լալայեան Ե.**, Ջանգեզուր, էջ 27): Ա. Բակունցը եկեղեցին հիշատակում է նաև «Կանաչ եկեղեցի» անվամբ. «Կորեան ուներ իր սուրբերը՝ Կանաչ եկեղեցի, սուրբ Մարտիրոս... Միայն Կանաչ եկեղեցին ուներ ժայռի մեջ փորած սանդուղքներ, որ իբրև թե յոթ տարի փորել էր մի մենակյաց...» (**Բակունց Ա.**, Կյորեա, Հնարանի, էջ 371):

ՊՀՊԿ-ի՝ 1946 թ. օգոստոսին Գորիս կազմակերպած գիտաբնագիտական զննարկի ղեկավար Գ. Մարգարյանի հաշվետվությունում եկեղեցու հորինվածքի մասին ասվում է. «Եկեղեցի Ս. Հռիփսիմե. գյուղի մեջ, միանավ բազիլիկայի ձևով, երկարավուն քառանկյուն սրահ, արևելքից լայն աբսիդայ բեմով: Թաղակապ տանիքով, մեջտեղից գտնված մի կամարով: Գլխավոր մուտքն արևմուտքից, մի փոքր դուռ հարավային պատի արևմտյան կեսում: Հյուսիսային պատի մեջ, աբսիդի մոտ, մի փոքր դուռ բացվում է մի երկարավուն քառանկյուն թաղակապ գավթի մեջ, որի դրսի դուռը հյուսիսային պատի մեջ է: Այս գավթիքը կամ խորանը եկեղեցու հյուսիսային պատի 2/3-ի երկարությամբ է: Մեկական մեծ լուսամուտներ արևմտյան և հարավային պա-

Հարավային մուտքի բարավորին պահպանվել է փոքրաթիվ կցագրերով, պարզ ոճով հետևյալ արձանագրությունը.

**«ՏԵՍԱՆԱԿ ԵՆԵԿԵՂԵՑԻՄ ՊՍՂՈՐԻ ՈՐԴԻ ՍԵԼԻՔ/ՈՂՆԱԽՆ:
ԹՎԼԻՆ ՈՄԻԵ (1776)»¹:**



Ս. Հովհաննես Եկեղեցու շինարարական արձանագրությունը

տերում, մի փոքր լուսամուտ հյուսիսային պատի մեջ: Շարվածքը կիսամշակ քարից կրաշաղախով» (ՀԱԱ, ֆ. 1063, ց. 1, գ. 1426, թ. 23): Խորհրդային կարգերի հաստատումից հետո եկեղեցին ներսից սվաղվել է, քարապատվել է արևմտյան դուռը, իսկ շինությունը վերածվել է «Ավանգարդ» կոլտնտեսության մթերման պահեստի (տե՛ս **Խանգաղյան Ս.**, Մատյան եղելությանց, Երևան, 1966, էջ 43):

Եկեղեցին հիմնովին վերանորոգվել է 2009-2013 թթ.՝ «Գորիս-Վիեն» քույր քաղաքների համագործակցության շրջանակում և Փարիզում 2010 թ. հուլիսին ֆրանսահայերի հիմնադրված «Երկիր և մշակույթ» հասարակական-բարեգործական կազմակերպության նախաձեռնությամբ ու ֆինանսավորմամբ (վերականգնող ճարտարապետ՝ Ստեփան Նալբանդյան): Եկեղեցին վերածվել է 2012 թ. սեպտեմբերի 29-ին: Սուրբ Խաչն օծվել է ձեռամբ Մուշեղ եպս. Բաբայանի (տե՛ս «Սյունյաց երկիր», Կապան, 2012, հոկտեմբերի 15, № 26):

¹ **Ստեփանյան Գ.**, Գորիս, ԴՀՆ (2006 թ.), տետր № 1, էջ 2: Արձանագրությունը հրատարակվում է առաջին անգամ: Նշենք, որ Գորիս գյուղի (Նոր կամ Ներքին Գորիս) հուշարձանների արձանագրությունները հրատարակած Մ. արքեպս. Տեր-Մովսիսյանի և Ս. Բարխուդարյանի մոտ հիշատակված չեն սույն եկեղեցու կառուցման վերաբերյալ վիմագրական որևէ տեղեկություն: Այդ բացը լրացվեց 2006 թ. հուլիսի 15-ին, երբ տողերիս հեղինակի ղեկավարությամբ և վիմագրության դասախոս Արտակ Գոռյանի մասնակցությամբ՝ Գորիսի պետական համալսարանի պատմության ֆակուլտետի 1-ին կուրսի ուսանողների հնագիտական և վիմագրագիտական պրակտիկայի ժամանակ ուսանողների ջանադիր աշխատանքի արդյունքում ամբողջությամբ մաքրվեց գոմի վերածված եկեղեցին, բացվեց քարապատված արևմտյան դուռը, սվաղի հաստ շերտից մասամբ մաքրվեցին նաև պատերն ու մույթերը: Հարավային մուտքի բարավորի սվաղը մաքրելու ժամանակ բացվեց եկեղեցու հիմնման մինչ այդ անհայտ մնացած պարզ, փոքրաթիվ կցագրերով քառատող արձանագրությունը:




Գորիս-Կյորես գյուղ. Ս. Հովհաննես եկեղեցի (1776 թ.)

Մեծ Մելիք-Օհանը մահացել է 1779 թ.: Գորիս գյուղի արևմտյան եզրին, լեռնալանջին գտնվող Մելիք-Հուսեինյանների տոհմական՝ «Մելիքների» անվամբ դամբարան-մատուռին (XVIII դ.) հարող Խոջա Բաղուն թաղի¹ հին գերեզմանատան հարավային հատվածում (դամբարան-մատուռից ավելի քան 80 մ հեռավորության վրա) ցայսօր պահպանված եռատող, փոքրաթիվ կցագրերով, մակերեսի ամբողջ երկայնքով ազնվականին վայել նախասիրությունների և կենցաղի քանդակներով հարդարված ու նուրբ նախշերով եզրափակված Մեծ Մելիք-Օհանի տապանաքարին պարզ ոճով և դյուրընթեռնելի արձանագրված է.

¹ Տե՛ս **Խանգաղյան Ս.**, Վիմագրերի աշխարհում, «Սովետական Հայաստան», Երևան, 1980, № 5, էջ 29:

«ԱՅՍ Է ՏԱՊԱՆ ԱՌՆ ՄԵԾԻ/ՄԷԼԻՔ ՈՂԱՆ ԻՇԽԱՆԻ/Ի : ՌՄԻԸ
(1779) : ԻՆ ՈՐ ԵՂԵԻ ԹՎԱԿԱՆԻ»



Մեծ Մելիք-Օհանի տապանաքարի արձանագրության գծապատկերը

Հիրավի, տապանաքարը բացառիկ ու արժեքավոր է չորս կողմերում արված պատկերազարդումներով: Քանդակազարդող վարպետը տապանաքարի երեսին պատկերել է խաչ, հյուսիսային և հարավային կողմերին պատկերել է ռազմի, որսի և ննջեցյալի կյանքի՝ դրախտային վայելքների արժանանալու տեսարաններ, արևմտյան կողմում՝ զարդանախշ խաչ, արևելյանում՝ Սուրբ հոգու խորհրդանիշն արտահայտող աղավնակերպ թռչուն՝ կանգնած կենաց ծառի երկու ճյուղերի գագաթին:



Մեծ Մելիք-Օհանի տապանաքարի հյուսիսային կողմը



Տապանաքարի հարավային կողմը

Տապանաքարի արձանագրության վերձանության քննության առումով կարևոր ենք համարում անդրադառնալ նախորդ ուսումնասիրողների դիտարկումներին և կատարել որոշ սրբագրումներ: Այսպես՝ արձանագրությունն առաջին անգամ ընդօրինակել և վերծանել է վանական պաշտոնական գործերով 1904 թ. հուլիս-օգոստոսին Երևանի թեմի Տաթևի փոխանորդություն այցելած արժանահիշատակ Մեսրոպ վրդ. (հետագայում արքեպիսկոպոս) Տեր-Մովսիսյանը (գիտությանը հայտնի Մեսրոպ Մագիստրոս անուն-տիտղոսով): Ըստ այդմ՝

«ԱՅՍ Է ՏԱՊԱՆ ՄԵԾԻ/ՄԵԼԻՔ ՈՂԱՆ ԻՇԵԱՆԻ/Ի ՌՄԻԸ (1779) ՈՐ ԵՂԵԻ ԹՎԱԿԱՆԻ»¹:

Սակայն Մ. վրդ. Տեր-Մովսիսյանը բնագրի առաջին տողում բաց է թողել **ԱՌՆ** բառը, իսկ երրորդ տողում թվականին հաջորդող՝ **ԻՆ** տառերը: Մենք դրանում համոզվեցինք, երբ կրկնակի այցելություններով՝ 2012 թ. հունիսի 15-ն և 2019 թ. հունիսի 7-ին հնավայրում կատարած դաշտային հետազոտական աշխատանքների ժամանակ մոտիկից դիտարկեցինք, խնամքով ընթերցեցինք ու վերծանեցինք բարեբախտաբար

¹ **Մեսրոպ Մագիստրոս արքեպ. Տեր Մովսիսեան**, Հայկական երեք մեծ վանքերի Տաթևի, Հաղարծնի եւ Դառի եկեղեցիները եւ վանական շինությունները, Երուսաղեմ, 1938, էջ 67:

դեռևս անխաթար և անաղարտ վիճակում գտնվող արձանագրությունը:

Մ. վրդ. Տեր-Մովսիսյանից հետո արձանագրությունը 1935 թ. վերծանել և հրատարակել է նաև Մերո Խանգադյանը: Հավանաբար ձեռքի տակ չունենալով Մ. վրդ. Տեր-Մովսիսյանի ընդօրինակությունը՝ նա, ցավոք, արձանագրությունը նույնպես վերծանել է որոշ աղավաղումներով ու թերի:

«Այս է տապան առն մեծի Մելիք-Օհան մեծ իշխանին, որ եղև (սպանումը) ՌՄԱ թուականին»¹:

Դժվար չէ նկատել, որ Մ. Խանգադյանը արձանագրության մեջ ընդմիջարկել է *սպանումը* բառը (թերևս ցանկացել է մատնանշել, թե իբր Մեծ Մելիք-Օհանը սպանվել է, ինչը չի փաստվում որևէ հավաստի սկզբնաղբյուրով), իսկ թվականի դեպքում, ՌՄ տառերից հետո ԻԸ տառերի փոխարեն Մ-ից հետո գրառել է Ա տառը: Ի դեպ՝ նշենք, որ Մ. Խանգադյանը արձանագրության սխալ թվագրումը զետեղել է նաև իր խմբագրությամբ լույս տեսած Վահան Բակունցի՝ Ակսել Բակունցին նվիրված փաստագրական արժեքավոր հուշապատման մեջ²: Ավելին, Մ. Խանգադյանը, հակված լինելով Բակունց (Բեգունց) տոհմի ծագումը կապել Մեծ Մելիք-Օհանի տոհմանվան հետ, հիմք ընդունելով միայն այն փաստը, որ չափաբերական մատյանում Ակսել Բակունցի հոր՝ Ստեփանի ազգանունը պապի՝ Օհանի անունով գրանցված է Օհանյան, առանց որևէ փաստագրական հիմքերի շտապել է եզրակացնել, թե իբր. «Օհանյան» ազգանունը վկայում է, որ Բակունց տոհմը ծագում է Գորիսում հռչակված քաջ Մելիք Օհանից (նահատակվել է 1751 թ.) »³: Հատկանշական է, որ արձանագրությունների վերծանման առիթով Մ. Խանգադյանը անկեղծորեն գրել է. «Ինչ խոսք, իմ օրինակածներից շատերը հայտնի են մեր մատենագրությանը: Բայց դրանք էլ ես իմ ձևով եմ կարդացել: Անշուշտ, իմ կատա-

¹ Տե՛ս **Խանգադյան Մ.**, Տեր-Հակովբե Տեր-Մինասյան Գորիսեցու «Հիշատակարանը», էջ 134:

² **Բակունց Վ.**, Մեծ հույզերի սերմնացանը, Երևան, 1976, ծան. 2, էջ 3:

³ Նույն տեղում:

րած գործի մեջ թերացումներ ու սխալներ կլինեն, որ կամովին չեն»¹:

Մեծ Մելիք-Օհանի տապանաքարի արձանագրությունը ընդօրինակել, վերծանել և հրատարակել է նաև վիմագիր արձանագրություններ հավաքելու նպատակով 1946, ապա 1958 թթ. ամռանը Վարարակնի հովիտ այցելած բազմավաստակ վիմագրագետ-պատմաբան Մեդրակ Բարխուդարյանը²՝ «Դիվան հայ վիմագրության» 2-րդ պրակում: Մակայն, պատշաճը հատուցելով վիմագրագետ անվանի գիտնականի՝ տարիներ ի վեր վիմական բնագրերի վերծանման տքնաջան վաստակին, խնդրո առարկա վիմագրի ոչ համարժեք ընթերցումը, անիրական վերծանումը և թեական թվագրումը, տեղիք է տվել հետագա ուսումնասիրողների թյուր կռահումներին՝ գլխավայր շրջելով պատմական իրողությունները, ինչպես ցույց են տալիս ստորև մատնանշած մեր փաստարկները: Եվ եթե չլիներ հարցի կարևորությունը, թերևս չանդրադառնայինք այս խնդրին, սակայն քանի որ այն աղերսվում է Նոր Գորիս գյուղի հիմնադրման և հատկապես Հաբանդ-Չագաձոր գավառում մի նոր մելիքական տոհմի հաստատման ժամանակի և հարակից հարցերի պարզաբանման խնդրին, ուստի հարկ ենք համարում այն հիմնական գծերով քննության առնել:

Այսպես՝ Ս. Բարխուդարյանի մոտ արձանագրությունը տեղ է գտել հետևյալ վերծանությամբ.

«ԱՅՍ Է ՏԱՊԱՆ ԱՌՆ ՄԵԾԻՆ ՄԵԼԻՔ ՕՀԱՆ ՄԱԼԽԱՍԻՆ ՈՒ ՄԻՐԻՆ, ՈՐ ԵՂԵԻ ԹՎԱԿԱՆ ԱՄԻՆ: ՌԻԱ: (1572)»³:

¹ **Խանգաղյան Ս.**, Վիմագրերի աշխարհում, «Սովետական Հայաստան», Երևան, 1980, N 5, էջ 28:

² Ի դեպ՝ Ս. Բարխուդարյանի՝ 1958 թ. գլխավորած գիտարշավախմբի լուսանկարիչն էր հայ դերասան, բեմադրիչ և հնագետ-լուսանկարիչ Արամ Վրույրի (Մաքաշյան) կրտսեր որդին՝ ՀՄՍՀ վաստակավոր դերասան Արտաշես Վրույրը, որի կատարած լուսագրումները հրատարակվել են «Դիվան հայ վիմագրության» հատորի II, III և V պրակներում (տե՛ս Դիվան հայ վիմագրության, պրակ II, էջ 6, տե՛ս նաև **Փաշայան Ռ.**, Արամ և Արտաշես Վրույրներ, Երևան, 1989):

³ Դիվան հայ վիմագրության, պրակ II, էջ 80:

Արձանագրության թվագրման առումով Ս. Բարխուդարյանը գրում է. «թվականը դնում ենք ենթադրաբար»¹, մինչդեռ արձանագրության բուն բովանդակությունը և թվագիրը բացահայտվում է հեշտությամբ և տարրնթերցումների առիթ չի տալիս: Մեկիքին վայել տապանաքարին փորագրիչը պարզ և հեշտ ընթեռնելի փորագրել է մահվան թվականը՝ **ՌՄԻԸ** (1779): Ամենագարմանալի սխալներից մեկը, որ տեղ է գտել Ս. Բարխուդարյանի վերծանած տեքստում, բնագրում ընդմիջարկված «**ՄԱԼԱՄԻՆ ՈՒ ՄԻՐԻՆ**» անուններն են, ինչը և տեղիք է տվել նշված թյուր ըմբռնումներին: Նա ավելացրել է նաև բնագրում բացակայող «**ԱՄԻՆ**» բառը: Մեզ համար անհասկանալի է մնում, թե ինչպես են ծագել այս անունների և բառի ընթերցումը, որովհետև, տեղում ուշադիր զննելով արձանագրությունը, այնտեղ չենք գտնում դրանցից և ոչ մեկը: Նկատենք, որ այդ նորամուծ անուններն ու «**ԱՄԻՆ**» բառը նշված չեն նաև արձանագրությունն առաջին անգամ հրատարակած Մ. վրդ. Տեր-Մովսիսյանի մոտ: Տեղին նշենք, որ այդ անունների՝ պատմական, իրական անձինք լինելը չեն փաստվում մատենագրական և վիմագրական որևէ աղբյուրով: Ի դեպ՝ Ս. Բարխուդարյանի աշխատությունում առկա են նմանաբնույթ այլ վրիպումներ ևս: Ինչպես, օրինակ, Մեծ Մեկիք-Օհանի՝ Ծակերի ձորի հյուսիսային մասում՝ Կամի ձորակում, իր և ծնողների հիշատակին կառուցած եկեղեցու արձանագրությունը նա տեղադրում է Գորիս գյուղում (Նոր կամ Ներքին Գորիս) գտնվող վիմափոր Ս. Մարտիրոս մատուռի հարավային մուտքի բարավորին²: Այնինչ Ս. Մարտիրոսը չունի հարավային դուռ:

Նախընթացում նշեցինք, որ Գորիսի մեկիքության հաստատման ժամանակի և առաջին մեկիքի ով լինելու հարցերին անդրադարձել է նաև Ս. Հախվերդյանը՝ հիմնականում հիմք ընդունելով Ս. Բարխուդարյանի վերոնշյալ արձանագրության վերծանած տեքստը: Մերժելով XVIII դ. 50-ական թվականների

¹ Տե՛ս նույն տեղում:

² Տե՛ս նույն տեղում:

վերջերին Գորիսի մելիքության հիմադրման իրողությունը՝ Ս. Հախվերդյանը, մելիքությունը վաղեմի դարձնելու միտումով, առանց որևէ հավաստի սկզբնաղբյուրային տվյալների, մելիքության սկիզբ է համարում XVI դարը: «Կան ուրիշ գրավոր փաստեր (sic!),- գրում է Ս. Հախվերդյանը,- որոնք վկայում են, որ Գորայք-Գորես-Գորիսում մելիքական տոհմը ծագում է վաղուց»¹: Իր տեսադրույթը հիմնավորելու համար Ս. Հախվերդյանը վկայակոչում է Ա. Բակունցի «Կյորես» վիպակում տեղ գտած «...Թիւ ՌԺԴ (1565) ... Ես Մելիք Էգան կառու(ցի) ...»² վիմագրական տեղեկությունը և, տարակուսելիորեն տարբերակելով Եգան և Օհան անձնանունները, Եգանին ևս դասում է մելիքների շարքում: Տեղին նշենք, որ Ս. Հախվերդյանի մոտ բացակայում է վերոնշյալ մեջբերման առաջին հատվածը, որը հստակություն է մտցնում խնդրո առարկա հարցի մեջ:

Շարունակելով քննությունը՝ կրկին անդրադառնանք Ս. Բարխուդարյանի վերձանած արձանագրության տեքստի քննությանը: Նշենք, որ թեև Ս. Բարխուդարյանը հստակ գրում է, որ արձանագրության «...թվականը դնում ենք ենթադրաբար», այդուհանդերձ, ավստասնքով պետք է նշել, որ այս հանգամանքը չի խանգարել Ս. Հախվերդյանին կատարել կանխակալ եզրահանգումներ: Այսպես՝ թերևս անձամբ տեղում չստուգելով արձանագրությունը և հիմնվելով միայն Ս. Բարխուդարյանի սխալաշատ վերձանության վրա, խորամուխ չլինելով վիմագրական փաստերի մեջ, առանց որևէ սկզբնաղբյուրային վկայության՝ նա շտապում է եզրակացնել (որը, ըստ նրա, կասկածի ենթակա չէ), թե իբր Մելիք-Օհանից առաջ եղել է Օհան անունով մի մելիք ևս, որը «...կրել է Մեծ մականունը և ապրել է XVI դարում, գուցե ավելի վաղ, քանի որ արձանագրության մեջ նշված Մալխասն ու Միրին իրենց կոչում են Մեծ Օհանի սերունդ»³: Ակներև է, որ Ս. Հախվերդյանին թյուրիմացության մեջ է դրել վիմագրում Ս. Բարխուդարյանի ընդմիջարկած «ՄԱԼԽԱՍԻՆ Ռ-

¹ **Հախվերդյան Ս.**, Գորիսի ամփոփ պատմություն, էջ 164:

² Նույն տեղում:

³ Նույն տեղում:

ՄԻՐԻՆ» անունները, ուստի նրա եզրակացությունը հիմնված է անիրական փաստերի վրա, որոնք չեն հիմնավորվում հավաստի աղբյուրներով: Ս. Հախվերդյանն ուշադրություն չի դարձրել այն կարևոր հանգամանքի վրա, որ արձանագրության նորամույծ անունները բնավ չեն պարունակում իմաստային-բովանդակային հատկանիշներ: Ավելին, Ս. Հախվերդյանը, Մեծ Մելիք-Օհանին համարելով XVI դարի գործիչ, նրանից հետո Գորիսի մելիքների շարքում հաջորդաբար զետեղել է նորամույծ անուններ (Եզան, Մալխաս, Միրի, Բաբա Պարոն, Խոջա Լալա, Բաղիր բեկ, Մելիք Օհան)¹, դրանով իսկ խախտել ոչ միայն Գորիսի մելիքության հիմնադրման ժամանակաշրջանը, այլև առաջին մելիք՝ Մեծ Մելիք-Օհանին հաջորդած մելիքների՝ ավագ և կրտսեր որդիներ՝ Մելիք-Հովսեփի (Ուսուր, 1779 թ.-1780-ական թթ. սկզբներ) և Մելիք-Հուսեփի (Մե(ի)յին, 1780-ական թթ. սկզբներ-1813 թ.), և ապա վերջինիս որդիներ՝ Առուստամի (1813-1822 թթ.), ու Հարությունի (Թյունի, 1822-1843 թթ.) պաշտոնավարման ժամանակագրական հաջորդականությունը:

Քննությունը համակողմանի կատարելու համար հարկ ենք համարում անդրադառնալ մի կարևոր խնդրի պարզաբանմանը ևս, որը նույնքան կարևոր է ինչպես Ս. Հռիփսիմե եկեղեցու կառուցման, այնպես էլ Մեծ Մելիք-Օհանի մահվան թվականի հարցը քննելիս: Բանն այն է, որ Ֆրանսիայում գործող «Երկիր և մշակույթ» հասարակական-բարեգործական կազմակերպության նախաձեռնությամբ 2010 թ. հուլիսի 28-ից օգոստոսի 31-ը «Պատմամշակութային ժառանգության գիտահետազոտական կենտրոն»-ի կազմակերպած հնագիտական աշխատանքների (գիտ. խորհրդատու՝ Հ. Սիմոնյան, ջոկատի ղեկավար՝ Խ. Վարդանյան) առիթով Ս. Հռիփսիմե եկեղեցին վերականգնող ճարտարապետ Ստեփան Նալբանդյանի հեղինակած՝ ««Հին Գորիս» բնակատեղի Մր. Աստվածածին եկեղեցի 1771 թ. (փաստաթղթեր, հ. 3)» վերտառությամբ ուսումնասիրության մեջ եկեղեցու կառուցման և Մեծ Մելիք-Օհանի մահ-

¹Տե՛ս նույն տեղում, էջ 165:

վան թվականի հարցում նույնպես առկա են էական անճշտություններ: Այսպես՝ հեղինակն առանց լուսաբանելու և վերլուծելու Մեծ Մելիք-Օհանի վերաբերող վիմագրական վերոնշյալ հավաստի արձանագրությունը, առաջնորդվելով միայն Ս. Բարխուդարյանի թերի ընդօրինակած վերոնշյալ արձանագրության վերծանությամբ, փորձել է այն ներկայացնել իբրև հաստատված ճշմարտություն: Մեծ Մելիք-Օհանի մահվան թվական համարելով 1771 թ.-ը՝ Ս. Նալբանդյանը գրում է, թե իբր եկեղեցին կառուցվել է այդ թվականին՝ ի հիշատակ Մելիք-Օհանի¹: Որպես փաստարկ իր հայտնած տեսակետի՝ Ս. Նալբանդյանը վկայաբերում է եկեղեցու կառուցման արձանագրության «**ՌՄԻԵ**» թվականը և մատնանշում, որ թեականորեն պետք է վերաբերվել տարեթիվ նշող վերջին **Ե** տառին՝ գտնելով, որ այն պետք է կարդալ **Ն**: «Սակայն կասկածներ կան,- գրում է նա,- վերջին «**Ե**» տառի հետ կապված, որն այն իրականում «**Ն**» է: Եթե ընդունենք, որ դա այդպես է, ապա վերջին տառը զուրկ է թվային արժեքից և պետք է կարդալ «1220-(Ի)Ն», որին գումարելով 551 ստանում ենք 1771, այսինքն՝ այն թվականը, որին մահացել է մելիք Օհանը»²: Տեղին նշենք, որ Ս. Նալբանդյանի եզրահանգումը հաստատող այլ կովաններ չկան: Հստակ է, որ արձանագրության չորրորդ տողում, ուր տեղ է գտել **ՈՂԱՆԻ** բառը, փորագրիչը որոշակիորեն տարբերակված ձևով է փորագրել **Ն** տառը, որը բնավ նման չէ **Ե**-ին: Եվ քանի որ Ս. Հռիփսիմե եկեղեցու կառուցման արձանագրության վերջին տառը գրչության տեսակետից պարզորոշ կարդացվում է **Ե** և ոչ թե՛ **Ն**, և, անտարակույս, Մեծ Մելիք-Օհանն էլ մահացել է **ՌՄԻԵ** (1799) թվականին, ուստի եկեղեցին կառուցվել է նրա մահվանից առաջ՝ **ՌՄԻԵ** (1776) թվականին:

Այսպիսով, առանց երկբայելու պետք է արձանագրել, որ եկեղեցին կառուցվել է ոչ թե 1771 թ. մահացած Մեծ Մելիք Օհանի հիշատակին, այլ՝ վերջինս է 1776 թ. կառուցել՝ ի հիշա-

¹ Տե՛ս **Նալբանդյան Ս.**, ««Հին Գորիս» բնակատեղի Սբ. Աստվածածին եկեղեցի 1771 թ. (փաստաթղթեր, հ. 3)», Երևան, 2011 (առանց էջակալման):

² Նույն տեղում:

տակ իրեն, այնպես, ինչպես կենդանության օրոք նա Ծակերի ձորում իր և ծնողների հիշատակին 1765 թ. կառուցել էր բազիլիկ եկեղեցի: Հետևաբար արձանագրենք, որ Ս. Հռիփսիմե եկեղեցու շինարարական արձանագրությունը ևս ավանդում է, որ Մեծ Մելիք Օհանն է եղել երկու այդ կառույցների պատվիրատուն, հովանավորողը (կտիտորը): Հանգամանք, որն ունի իր նախադեպերը: Զորօրինակ՝ Շղուկ գավառի գեղատեսիլ Լորաձորի հովտում գտնվող Լոր գյուղի Ս. Գևորգ եկեղեցին, որն իր և որդիների հիշատակին իր իսկ ծախսով 1664 թ. կառուցել է տվել ագուլեսցի խոջա Պողոսը. «...եկեղեցին ինչպես մի արձանագրութիւնից երևում է՝ շինել է Ագուլեցի խօջա Պօղոսն իւր ծախքով, իւր յիշատակին...»¹:

Մեծ Մելիք-Օհանին կից թաղված է որդին՝ Բաղրը, որի պարզ և հեշտ ընթերցվող քանդակագարդ տապանաքարին արձանագրված է.

«ԱՅՍ Է ՏԱՊԱՆ Կ ՄԷԼԻՔ Կ ՀՈՒԱՆԻ Կ ՈՐԴԻ ԲԱՂԻՐ ԲԷԿ/ԻՆ. ԹՎ.:
ՌՄԻԷ (1778)»²:

Արձանագրությունը ժամանակին ընդօրինակել, վերծանել և հրատարակել է Ս. Բարխուդարյանը և այն թվագրել՝ ՌՄԻ (1771), իսկ գրչանկարում՝ ՌՄԻԼ թվականով, միաժամանակ պարզաբանել, որ «Թվականության վերջին Լ-ն կամ ավելորդ է կամ Ա-ի մնացորդ»³: Նշենք, որ թեև թվականի վերջին հատվածը խիստ մաշված և վնասված է, սակայն Ի տառից հետո ուրվագծվում է ոչ թե Լ, կամ Ա, այլ՝ դժվարընթեռնելի, սակայն մոտիկից հստակ ուրվագծվող Է տառի բնորոշ մասնիկը: Մենք դրանում համոզվեցինք, երբ 2019 թ. հունիսի 7-ին մի վերջին անգամ մոտիկից հետազոտեցինք արձանագրությունը: Ըստ այդմ՝ այն թվագրվում է ՌՄԻԷ (1778) թվականով:

Սույն արձանագրության վերծանմանն անդրադարձել է նաև Ս. Հախվերդյանը: Ցավոք, ստիպված ենք արձանագրել, որ

¹ Հնութիւնք վանօրէից Սիւնեաց աշխարհի: Գիրք հինգերորդ, կազմեց՝ Ս. Փափագեանց, Վաղարշապատ, 1982 (էջակալման):

² Մտեփանյան Գ., Գորիս, ԴՀՆ (2011-2012 թթ.), տետր № 2, էջ 5:

³ Դիվան հայ վիմագրության, պրակ II, էջ 80:

նա այս դեպքում ևս վիմագիրն ըստ էության տեղում չի ընթերցել և չի հոգացել արձանագրության բովանդակության հավաստի վերծանման ու թվագրման մասին, այլ բավարարվել է միայն իր ձեռքի տակ եղած Ս. Բարխուդարյանի վերծանությամբ: Տապանաքարն անվերապահորեն վերագրելով Մելիք-Օհանին և հիմք ընդունելով Ս. Բարխուդարյանի վերծանած վերոնշյալ երկու արձանագրությունների սխալ թվագրումը՝ Ս. Հախվերդյանը գրում է. «Մելիք-Օհանի գերեզմանը գտնվում է հին Գորիսի հանգստարանի բլրի եկեղեցու հարավային պատի տակ: Տապանաքարի վրա կարդում ենք.

«Այս է տապան – Մելիք Հուանի (Օհան) որդի Բաղիր բեկին. Թվ ՌՄԻ: (1771)»¹: Բերված արձանագրության բովանդակությունից, սակայն, ամենևին էլ չի բխում այն հետևությունը, որ անում է Ս. Հախվերդյանը: Միանշանակ չի կարելի համաձայնել Ս. Հախվերդյանի հետ նախ՝ այն պատճառով, որ տապանաքարը գտնվում է ոչ թե «բլրի եկեղեցու հարավային պատի տակ», այլ՝ Մելիք-Հուսեփյանների տոհմական «Մելիքների» անվամբ դամբարան-մատուռից ավելի քան 80 մ հեռավորության վրա՝ Մեծ Մելիք-Օհանի տապանաքարին կից, և երկրորդ, որն ամենաէականն է, արձանագրության տառաշարքի իմաստային ստույգ բառանշատման և բովանդակության ուշադիր վերլուծությունը ցույց է տալիս, որ տապանաքարը պատկանում է ոչ թե Մեծ Մելիք-Օհանին, այլ՝ 1778 թ. մահացած նրա որդուն՝ պապի անունը կրող Բաղրին: Այն, որ տապանաքարը պատկանում է Բաղրին, փաստվում է հենց Մեծ Մելիք-Օհանի կողմից տապանաքարի գլխամասում կանգնեցված խաչքար-կոթողով, որն ունի փոքրաթիվ կցագրերով եռատող, քիչ մաշված, սակայն մոտիկից ուրվագծվող տառերի բնորոշ մասնիկներով հետևյալ արձանագրությունը.

«**Մ ՅՍ Է ԽԱՉՍ/ ՄԵԼԻՔ ՀՈԱՆ/ԳԱԿՑՈՒՐՑ**»²:

Ուշագրավ է վիմագրում **ԳԱԿՑՈՒՐՑ** բառի գործածությունը, որը Ս. Բարխուդարյանը վերծանել է վրիպումով՝

¹ Հախվերդյան Ս., Գորիսի ամփոփ պատմություն, էջ 163:

² Ստեփանյան Գ., Գորիս, ԴՀՆ (2011-2012 թթ.), տեսք № 2, էջ 5:

ԱԿՑՈՒՑ¹: Հայտնի է, որ շատ դեպքերում արձանագրություններում կիրառվել են բարբառային ձևեր ունեցող մի շարք անուններ ու բառեր: Նկատվում են նաև գրչության որոշ օրինաչափ շեղումներ և հնչունային հապավումներ: Մյուսնիքում, մասնավորապես Գորիսի բարբառում, նման բառ ու բառաձև չկա, ուստի, որքանով կարող ենք դատել արձանագրության բովանդակությունից, իբրև գուտ նախնական վարկած, կարելի է ենթադրել, որ **ԳԱԿՑՈՒՐՑ** ձևը *կանգնեցրի* (բրբ. *կանգնեցրեցի*) բայաձևերի սխալ գործածության հետևանք է:



Մեծ Մելիք-Օհանի (ձախից) և նրա որդու՝ Բաղրի տապանաքարերը «Մելիքների» դամբարան մատուռից ներքև

Մի նկատառում ևս: Մ. Հախավերդյանը մելիքների շարքին է դասել նաև Բաղր բեկին, ով կարող էր ժառանգել մելիքական իրավունքը հոր մահից հետո միայն: Մինչդեռ վերոնշյալ վիմագիր արձանագրությունը վկայում է, որ Բաղրը մահացել է Մեծ Մելիք-Օհանի կենդանության օրոք: Բացի այդ՝ մեր եզրա-

¹ Դիվան հայ վիմագրության, պրակ II, էջ 80:

հանգման օգտին է խոսում այն փաստը, որ Բաղրի տապանաքարին արձանագրված է ոչ թե մելիք, այլ՝ բեկ տիտղոսը: Այսպիսով՝ ասվածի լույսի ներքո կարելի է սպառված համարել Մեծ Մելիք-Օհանի և նրա որդու՝ Բաղրի տապանաքարերի հիշատակագրության վերծանության մեր սրբագրումները, որ անհրաժեշտ էր թեկուզև գիտական շրջանառության մեջ դրված **ՌԻՍ** (1572) և **ՌՄԻ** (1771) անիրական թվականները հերքելու նպատակով:

Ամփոփենք: Ըստ ժամանակագրական կարգի՝ Չագեձորի հովտում նախ՝ հիմնվել է Վարաբակն գետակի վերին հոսանքի ձորամիջում Ստեփաննոս Օրբելյանի վկայակոչած Գորայք-Գորիսը, ապա՝ XVIII դ. 60-ական թվականների վերջերին, Լաստի խութ լեռան հյուսիսային լանջերն ակոսող ձորում, Վարաբակն գետակի ձախափնյակում՝ Նոր Գորիսը:

XVIII դ. 50-ական թվականների վերջերին Սյունիքի Հաբանդ կամ Չագեձոր գավառում Տաթևի ընդարձակ մելիքությունից կազմվել է Ղարաբաղի խանությանը ենթակա Գորիս-Կյորես նստոց-կենտրոնով մի նոր մելիքություն: Մելիքության հիմնադիրն էր Գորայք-Գորիս (Հին Գորիս, Վերին Շեն) գյուղի մեծատուն տոհմից սերող, խոջա Լազարի թոռ՝ Բաղրի որդի Օհանը: Ընդամին՝ վիմագրական փաստերով ճշտվեց նաև, որ Մեծ Մելիք-Օհանը մահացել է ոչ թե 1771 թ, այլ՝ 1779 թ., իսկ նրա որդին՝ Բաղրը՝ 1778 թ.:

**ԴԻՏԱՐԿՈՒՄՆԵՐ ԳՈՐԻՍԻ ՄԵԼԻՔՈՒԹՅԱՆ ՀԻՄՆԱԴՐՄԱՆ
ԵՎ ԱՌԱՋԻՆ ՄԵԼԻՔԻ՝ ՄԵԾ ՄԵԼԻՔ-ՕՉԱՆԻ ՈՒՆՐԱ
ՈՐԴՈՒ՝ ԲԱՂՐԻ ՎԻՍԱԳՐԱԿԱՆ ԱՐՁԱՆԱԳՐՈՒԹՅՈՒՆՆԵՐԻ
ՇՈՒՐՁ**

ԱՄՓՈՓՈՒՄ

ԳԵՎՈՐԳ ՍՏԵՓԱՆՅԱՆ

XVIII դ. 50-ական թվականների վերջերին Սյունիքի Հաբանդ կամ Չագեձոր գավառում Տաթևի ընդարձակ մեղիքությունից կազմվել է Ղարաբաղի խանությանը ենթակա Գորիս-Կյոբրես նստոց-կենտրոնով մի նոր մեղիքություն: Մեղիքության հիմնադիրն էր Գորայք-Գորիս (Հին Գորիս, Վերին Շեն) գյուղի մեծատուն տոհմից սերող, խոջա Լազարի թոռ՝ Բաղրի որդի Օհանը: Ընդամին՝ վիմագրական փաստերով ճշտվեց նաև, որ Մեծ Մեղիք-Օհանը մահացել է ոչ թե 1771 թ, այլ՝ 1779 թ.: Իսկ նրա որդին՝ Բաղրը մահացել է 1778 թ.:

Բանալի բառեր - Վիմագրություն, Հաբանդ-Չագեձոր, Գորայք-Գորիս (Հին Գորիս, Վերին Շեն), Ծակերի ձոր, Նոր կամ Ներքին Գորիս (Ներքին Շեն), Մեծ Մեղիք-Օհան, Բաղր:

АНАЛИЗ ОСНОВАНИЯ ГОРИССКОГО МЕЛИКСТВА И ЛИТОГРАФИЧЕСКИХ НАДПИСЕЙ ПЕРВОГО МЕЛИКА МЕЦ МЕЛИК-ОГАНА И ЕГО СЫНА БАГРА

РЕЗЮМЕ

ГЕВОРГ СТЕПАНЯН

В конце 50-ых годов XVIII века в Абандском или Дзагедзорском уезде Сюника от обширного Татевского меликства отделилось и образовалось новое

меликство с центром в Горис-Кересе под подчинением Карабахского ханства. Основателем меликства был сын Багра Оган – представитель знатного рода из села Горайк-Горис (Старый Горис, Верин Шен). Литографическими свидетельствами доказывается, что Мец Мелик-Оган скончался не в 1771, а в 1779 году.

Ключевые слова: литография, Абанд-Дзагедзор, Горайк-Горис (Старый Горис, Верин Шен), Цакери дзор, Новый или Неркин Горис (Неркин Шен), Мец Мелик-Оган, Багр.

**SOME OBSERVATIONS RELATING TO THE LITOGRAPHIC
RECORDS OF THE FOUNDER AND THE FIRST MELIK OF GORIS
- PRINCEDOM MELIK-OHAN THE GREAT, AND HIS SON
BAGHR**

SUMMARY

GEVORG STEPANYAN

In the late 50s of the 18th century a new principedom with a residential centre called Goris-Kyores, subject to Karabagh khanate was formed from the large Tatev principedom in the province Haband or Dzaguedzor of Syunik. The founder of the principedom was Khojah Lazar's/who came down from the grand family Gorayk-Goris(old Goris, the village of Verin Shen) grandson and Baghr's son Ohan. Besides, it has also been discovered that Melik-Ohan the Great died in 1771 rather than in 1779.

Key words: lithography, Haband – Dzaguedzor, Gorayk-Goris (old Goris, the village of Verin Shen), the gorge of Tsakeri, New or Inner Goris (Inner Village), Melik-Ohan the Great, Baghr.

ԳՐԱԿԱՆՈՒԹՅՈՒՆ

1. **Ալիշան Ղ.**, Միսական: Տեղագրութիւն Միւնեաց աշխարհի, Վենետիկ, 1893, 600 էջ:
2. **Աճառյան Հ.**, Հայոց անձնանունների բառարան, հ. Գ, Երևան, 1946, 659 էջ:
3. «Ազգագրական հանդէս», Թիֆլիս, 1897, գիրք Բ, 383 էջ:
4. **Բարխուտարեանց Մ.**, Արցախ, Բագու, 1895, 461 էջ:
5. **Բարխուտարեանց Մ.**, Պատմութիւն Աղուանից, հ. Բ, Թիֆլիս, 1907, 192 էջ:
6. **Բալայան Վ.**, Շուշի. Տեղն ու դերը Հայոց քաղաքակրթական համակարգում, Երևան, 2017, 560 էջ:
7. **Բակունց Ա.**, Կյորեւ, Ընտրանի, Երևան, 2009, էջ 719:
8. **Բակունց Վ.**, Մեծ հույզերի սերմնացանը, Երևան, 1976, ծան. 2, էջ:
9. **Գրիգորյան Գ.**, Գյուղական նոր բնակավայրերի հիմնումն ու բնակչության վերաբնակեցումը միջնադարյան Հայաստանում (Հայաստանի պատմական ժողովրդագրության հիմնահարցեր. Հայկական լեռնաշխարհը հայ էթնոսի բնօրրան: Հայագիտական գիտաժողով (գեկուցումների հիմնադրույթներ), Երևան, 2004, էջ 39-40:
10. Դիվան հայ վիմագրության: Պրակ II: Գորիսի, Միսիանի և Ղափանի շրջաններ: Կազմեց՝ **Ս. Բարխուդարյան**, Երևան, 1960, 240 էջ:
11. **Էփրիկեան Ս.**, Պատկերագարդ բնաշխարհիկ բառարան, հ. Ա, գիրք Ա, Վենետիկ, 1903-1905, 808 էջ:
12. Թուրքական աղբյուրները Հայաստանի, հայերի և Անդրկովկասի մյուս ժողովուրդների մասին, հ. Ա: Կազմեց՝ **Ս. Սաֆրաստյան**, Երևան, 1961, 404 էջ:
13. Ժամանակագրութիւն **Ստեփաննոսի Օրբէկեանի**: Հրատարակության պատրաստեց **Աջ. Աբրահամյանը**, Երևան, 1942 45 էջ:
14. ԺԵ դարի հայերեն ձեռագրերի հիշատակարաններ: Մասն Ա (1401-1450 թթ): Կազմեց՝ **Լ. Խաչիկյան**, Երևան, 1955, 817 էջ:

15. **Լալայեան Ե.**, Զանգեզուր: Նիւթեր ապագայ ուսումնասիրութեան համար, «Ազգագրական հանդէս, Թիֆլիս, 1898, գիրք Դ, № 2, էջ 7-16:
16. **Լիսիցյան Ստ.**, Զանգեզուրի հայերը, Երևան, 1969, 336 էջ:
17. **Խանգաղյան Ս.**, Տեր-Հակովբ Տեր-Մինասյան Գորիսեցու «Հիշատակարանը», ԲՀԱ, Երևան, 1989, № 2, էջ 125-136:
18. **Խանգաղյան Ս.**, Վիմագրերի աշխարհում, «Սովետական Հայաստան», Երևան, 1980, № 5, էջ 29:
19. ՀԱԱ, ֆ. 47, ց. 1, գ. 693 ; ֆ. 1109, ց. 1, գ. 46 ; ֆ. 798, ց. 1, գ. 1220 ; ֆ. 1063, ց. 1, գգ. 368, 1426, 1545:
20. **Հակոբյան Թ., Մելիք-Բախշյան Ստ., Բարսեղյան Հ.**, Հայաստանի և հարակից շրջանների տեղանունների բառարան, հ. 1, Երևան, 1986, 4814 էջ:
21. Հայաստանի Հանրապետության ֆիզիկաաշխարհագրական օբյեկտների համառոտ տեղեկատու-բառարան, Երևան, 2007, 136 էջ:
22. Հայոց պատմություն, հ. III, Նոր ժամանակաշրջան (XVII դարի երկրորդ կես-1918 թ.): Գիրք առաջին (XVII դարի երկրորդ կես-XIX դարի վերջ), Երևան, 2010, 757 էջ:
23. Հնութիւնք վանօրէից Միւնեաց աշխարհի: Գիրք հինգերորդ, կազմեց՝ Մ. Փափազեանց, Վաղարշապատ, 1982 (էջակալման):
24. **Հախվերդյան Ս.**, Գորիսի ամփոփ պատմություն, Երևան, 2005, 446 էջ:
25. **Հասրաթյան Ս.**, «Ձորաշէն-Գորու», ՀԱԱ, ֆ. 1109, ց. 1, գ. 46, թ. 2:
26. **Ղարագոյոյան Ա.**, Չազաձորի տեղադրությունը, ԼՀԳ, Երևան, 1985, № 11, էջ 58-62:
27. **Մարգարյան Ալ.**, Գորիսի բարբառը, Երևան, 1975, 568 էջ:
28. **Մարգարյան Ալ.**, Մի քանի տեղանունների ծագման մասին, ՊԲՀ, Երևան, 1988, № 4, էջ 123-124:
29. **Մեսրոպ Մագիստրոս արքեպ. Տէր Սովսիսեան**, Հայկական երեք մեծ վանքերի Տաթևի, Հաղարծնի և Դաղի եկեղեցիները եւ վանական շինութիւնները, Երուսաղէմ, 1938, 152 էջ:

30. **Մելիքսեր-Բեկ Լ.**, Վրաց աղբյուրները Հայաստանի և հայերի մասին, հ Գ. (ԺԸ-ԺԹ դդ), Երևան, 1955, 345 էջ:
31. «Մեղու Հայաստանի», Թիֆլիզ, 1886:
32. **Նալբանդյան Ս.**, ««Հին Գորիս» բնակատեղի Մբ. Աստվածածին եկեղեցի 1771 թ. (փաստաթղթեր, հ. 3)», Երևան, 2011 (առանց էջակալման):
33. «Նոր-Դար», Թիֆլիս, 1885:
34. **Ջալալեանց Ս.**, Ճանապարհորդություն ի Մեծն Հայաստան, մասն Բ, Տիֆլիս, 1858, 458 էջ:
35. **Սարգսյան Ս.**, Արցախի բնակավայրերը (ստուգաբանություններ), Երևան, 2018, 200 էջ:
36. **Ստեփանյան Գ.**, Միմեոն Տեր-Մինասյան. մանկավարժն ու հրապարակախոսը (Գորիսի պատմության դրվագներ), Երևան, 2019, 615 էջ (ձեռագրի իրավունքով):
37. **Ստեփանյան Գ.**, Գորիս (դաշտային հետազոտական նյութեր, (2011-2012 թթ.)), տետր № 2, 10 էջ:
38. **Սարգիս արքեպիսկոպոս Ջալալյանց**, Ճանապարհորդություն ի Մեծն Հայաստան, մաս Ա, Բ: Գրաբարից աշխարհաբար թարգմանությունը և ծանոթագրությունները՝ **Ս. Գրիգորյանի**, Երևան, 2016, 694 էջ:
39. **Ստեփաննոսի Մինեաց եպիսկոպոսի** պատմություն Տանն Միսական, ի լոյս ընծայեաց **Մկրտիչ Էմին**, Մոսկվա, 1861, 387 էջ:
40. **Ширакуни Н.**, Зангезурский уезд Елизаветпольской губернии (гл. VII, Бывшие армянские мелики). Сборник материалов для описания местностей и племен Кавказа, вып. XXXIV, Тифлис, 1904, отд. I, с. 202-204.
41. **Րաֆֆի**, Երկերի ժողովածու, հ. 6, Երևան, 1963, 559 էջ:
42. **Փաշայան Ռ.**, Արամ և Արտաշես Վրույրներ, Երևան, 1989, 105 էջ:
43. **Քումուրց Մ.**, «Գորիս» տեղանվան ստուգաբանություն: Գիտական հոդվածների ժողովածու (Նվիրվում է Հրաչյա Աճառյանի ծննդյան 140-ամյակին), Երևան, 2016, էջ 378-396:

44. Армяно-русские отношения в втором тридцатилетии XVIII века. Сборник документов, т. III, отв. ред. **В. Восканян**, Ереван, 1978, 409 с.
45. **Петрушевский И.**, Очерки по истории феодальных отношений в Азербайджане и Армении в XVI – начале XIX вв., Ленинград, 1949, 384 с.
46. Mémoires historique et géographiques sur l'Arménie, **J. A. Saint-Martin**, t. II, Paris, 1819, 519 p.